

Haska inũbariai Jesus Cristõ João unãmani hãtxakiaki APOCALIPSE

Na hãtxa Joãonẽ hatu keneshunikiaki, na hãtxarã

1 ¹Ha dukũ Deusũ Jesus Cristo ishanai unãmaniki. Hanushũ eari samama hawaira haskashanai ea ã hawẽ tsuma João unãmakatsis ikĩ hawẽ nai tsuma Jesus Cristõ yunua ea uĩmaxinaki, na haska inũbariai dasibi nũ hawẽ tsumabũ tapitã hatu yusíkubaĩshanũ ea unãmakinã.

²Haskawẽ taeshũ Deusũ hãtxa inũ, Jesus Cristõ ea unãmaxina ã nĩkaxina inũ, dasibi ã uĩxina hawa txanitxakama ã matu yui kayabiai. ã hãtxa txanima uĩkĩ nĩkairakãwẽ.

³Tsuabũra na ã hãtxa hatu yuiaibu inũ habũ na hãtxa nĩkatã: “Txanimaki”, ikĩ txibãkubaĩshanaiburã, Deusũ habu benimawashanikiki, haska inũbariai txanini ma hamapai tashni taeai uĩnã.

⁴Mã Jesus txibaĩbu ha sete yusĩnanaĩ itxamisbu tibi Ásia mai pakeanuabuũ, ã Joãonẽ, ã matu kene bumai nĩkairakãwẽ. Ha ini inũ, ikũkainai inũ, ana hushanaitũ, nukũ Deusunã, hau matu duawakĩ hawẽ pepa matu inãkĩ unãnuma matu hiwemakubainũwẽ. Habiaskari wakĩ ha sete yushĩ pepa hawẽ shanẽ ibu tsauti bebũ mapuabu hau habũ habiaskari matu wanũbũwẽ. ⁵Ha dikabi Jesus Cristo hawa txani txakaisma mawatã ha dukũ bestẽni inũ mai hirabi anu habu shanẽ ibu betsa betsapa binui hatũ shanẽ ibumisrã, hau hatũ matu unãnuma hiwemarianũwẽ. Ha inũ, nuku abui nukuwẽ nuikĩ nukũ txakabuwẽ taea mawakĩ hawẽ himi habakĩ nuku buashũrianiki. ⁶Na habiatĩã hawẽ Epa Deus dayashuni nuku habe hãtxanika wakĩ hatũ nuku shanẽ ibu keska waniki. Haskawẽ taea dasibi hawenas kuxipa haya inũ pepa hayakẽ niti ikama kẽwãkubainãkãwẽ. Haskakirã.

⁷Uĩa. Nai anua nukũ Shanẽ Ibu nai kuĩwẽ huai dasibibũ uĩshãkanikiki.

Ha dikabi habū hatu tenāmanibu inū
 habū danāmisbu mai hirabi anu manibaunabū
 uī datei kashashākanikiki.
 Haskashākanikiki, txanimarā.

⁸Hanua mai hayariama nukū Shanē Ibu Deus dasibi kuxipahaira hiwea haya inū, natiā hiwekūkainai inū, ana hushanaitū ea yuikī: “Ea dukū ē hiweni inū ē hawē henea debesekeaki”, ea washuki.

Jesūsū João betsa watā uīmanikiaki, na hātcharā

⁹Ea ē matū betsa Joāonā, matu keska Jesuski dasia Deusbe shanē ibuaiibe nia betsa betsapa tenei txitūāma Jesūsū kuxipawē ē binukubainai. Ha inū, Deusū kakape yusīkī Jesūsū nuku mekekatsis ikai shabakabi ē hatu yuikubainaiwē taeshū na natukā hawē kena Patmos anu ea nitxiābu ¹⁰nukū Shanē Ibu hanu bestēni shaba domingo betsatiā Deus ē yushīki nukushū ea betsa wa ē nīkaya ē petxiurishū hui kuxipahaira trombeta mimawati keskawē ¹¹tsuāra ea yuikī:

“Hawara ē mia uīmai unaki keneshū Ásia mai pakea anu ha sete yusīnanaī itxamisbu tibi anu bumashāwē, Éfeso anu inū, Esmirna anu inū, Pérgamo anu inū, Tiatira anu inū, Sardes anu inū, Filadélfia anu inū, Laodicéia anurā”, ea waya

¹²tsuā ea hātcha wai dabanē uīnū ika nasauketā uīkī haki bī tsaūti sete ouro mane txāka daka tsaubauna uīkī ¹³ha namakis huni kayabi keska nia ē uīshuki. Hakiri matu yuinū nīkakāwē. Hawē tari txaiapa hupushku anu kesua inū, hawē ouro mane nanesheketi shutxi putxinī kesuaki. ¹⁴Ha inū, hawē bu hushupahaira inū, hawē beru txi here txasha keskaki. ¹⁵Ha inū, hawē tae mane taxipa betsa hawē kena latāo reluzente txi merā napua txashahaira keskaki. Ha inū, hawē hui hene diri ikai nīka keskaki. ¹⁶Ha inū, hawē mekē yusiuri sete bixi tsuma inū, hawē hashpanu nupe detenameti txaipahaira kenu dabeya tukuā hayaki. Ha inū, hawē besu bari keska txashakī shabawaki.

¹⁷Haska uī hawē tae namā mawa keskai tsistikaī ē tī ika daka hawē mekē yusiuri ea mekī yuikī:

“Dateyamawe. Earā, ea dukū ē hiweni inū ē hawē henea debesekeaki. ¹⁸Ea ē hiwea ē mawani natiā ana ē bestēni niti ikama ē hiwepakeai. Ha inū, hiwemati kuxipa inū kupiti kuxiparā, ea besti ē hayaki. Hanu mawai ikibi ishanaibu anurā, eā besti ē yunutiruki. ¹⁹Dasibi mī uīshu inū, na habiatiā ikai inū, haskarara inūbariai unaki hatu keneshūriwe. ²⁰Ha hawara hunea mī uīshu shabakabi mia yusīnū nīkawe. Ha sete bixi ē mekē yusiuri ē tsuma mī uīshurā, ha sete mae itxamisbu tibitū merabenā Deus yuishunikaki. Ha dikabi haki bī tsaūti sete ouro mane txāka daka mī uīshurā, ha sete mae ikūwaību itxamisbuki”, iwanā,

Éfeso anuabu dukū keneshū bumai txani taenikiaki, na hātcharā

2 ¹ana Jesūsū ea yuikī:

“Ha mae anu hatū Deusū hātcha yuishunika Éfeso anua itxamisbu mekea na hātcha ē mia yuiāi keneshūriwe: ‘Ha sete bixi ē mekē yusiuri ē

tsuma inũ haki bĩ tsaũti sete ouro mane txākā daka namakis anu ē nimistũ na hātxa ē matu yuiai nĩkairakāwē. ²Ea txibākĩ ea dayashũkĩ bika tenei mã txĩtuābumaki. Ha inũ, tsuabũra matu parāmisbũ yuikĩ: Jesusũ kuxipawē ē hawē yununikaki. Ea nĩkakāwē, ikaibu unātā hatu danākĩ ³ē hātxa heneama ea duawanũ ika ewē taea nuitapabiai punu nukai txĩtuāma mã txibākubainai ē matu unaiĩ. ⁴Hakia na bestiwē ē matu txiteai nĩkakāwē. Ha dukũ ea ikũwākĩ taewakĩ mã ea duahairawakubaini keskama mã ana habias keska ea wamaki. ⁵Haskawē taeshũ haska mã ea duawakĩ taewani keska hani mã benukaĩnimamē, ana xināhairatā matũ huĩti pewakĩ xinā betsa watā ana Deus anu txĩtūtā ea txibākubaĩkāwē. Hamē mã haska betsa wamakē matu anu ana kashũ matu danākĩ matũ ouro mane txākā daka matu anua mebĩkĩ ē tsekashanaii. ⁶Hamē ha parananāmis Nicolau txibāmisbu ē danātxakayamamis keska wakĩ matũri mã hatu abuabuma ē unaiĩ. ⁷Mã pabĩkiyabunā, Yushĩ Papatũ ha mã itxamisbu matu yuiai nĩkakāwē: Tsuabũra ea danāma habũ maemakĩ binumisburā, mae pepa naiuri hanu Deus hiwea anua hawē benimai hiweti hi bimi ē matu pimashanaii, niti ikamarā, ikĩ”, ea washu ē matu keneshunaii.

Esmirna anuabu keneshũ hatu bumanikiaki, na hātcharā

⁸Ana Jesusũ ea yuikĩ:

“Ha hatũ Deusũ hātxa yuinika Esmirna anu itxamisbu mekea anu na hātxa ē mia yuiai keneshũriwe:

‘Earā, ea dukũ ē hiweni inũ ē hawē henea debesekeaki. Mawabiatā ē ana bestēni ē hiweatũ ē matu yuiai nĩkakāwē. ⁹Natiā bika betsa betsapa tenei hawauma mã nuitapaibu ē unaiĩ. Haskabia txanima matũ manakuti itxapa nai anu matuki nũ tana mã hayaki. Ha inũ, habu matukiri hātxa atimapa hātchai inũ ibubiskiri yui: Ē judeuki, ibiai ikũ kayabiwama haska Satanāsā abuai besti txibāmisbu ē hatu unāriaii. ¹⁰Matu bika memashanaibuwē taea dateyamakāwē. Eska wakĩ diabō bestibu matu hatu atximatā bitxiti hiwe anu matu bitximashanikiki. Haska wakĩ dasibi mã ea ikũwaĩbu matu bika tenemaibu hawē matu unāti wakeakeshākanikiki. Haskawē taea dez dia besti haska matu tenemaibuwē taea txĩtũyamashākāwē. Matu itxakawakĩ matu tenābiaibũ tenekubaĩshākāwē. Matu haska waibuwē taeshunā, eānā, matũ manakuti inākinā, hiwea kayabi ē matu ināshanaii. ¹¹Mã pabĩkiyabunā, Yushĩ Papatũ ha mã itxamisbu matu yuiai nĩkakāwē: Tsuabũra ea danāma habũ maemakĩ binumisburā, ana haria dabeki mawakĩ txi here meama ishākanikiki’ ”, ea washu ē matu keneshunaii.

Pérgamo anuabu keneshũ hatu bumanikiaki, na hātcharā

¹²Ana Jesusũ ē João ea yuikĩ:

“Hatũ Deusũ hātxa yuinika Pérgamo anu itxamisbu mekea na hātcha ē mia yuiai keneshũriwe:

‘Ē mane nupe txaipahaira kenu dabeya hayatū ē matu yuiyai nīkakāwē. ¹³Hanu Satanás shanē ibui tsauwa anu mā hiweabu ē unaiī. Ha inū, Antipas ē hātxa yuishunika txītuāma matū mae anushū tenābianibū ha xināi maturi txītuāma eki hawa dakeama yurabuki txanikī ē yusīa ikūwākī mā txibākubainai ē unāriai. ¹⁴Mā haskabia kanei eska tibi matu anu hayabu matu yuinū nīkakāwē. Ha mā habube itxabiamis hatiribū Balaāonē yusīni putabumaki. Israelbu hau Deuskiri txakabushanūbū Balaāonē nawa shanē ibu Balaque yusītxakakī yuikī: Hatu beyusmakī yushī dami kēwāti betsa nami ināxinabu hatu pimashāwē, ani inū matū bake txipaxbe hatu txutanamemati hatu xināmarshāwē, ani haska heneabumaki. ¹⁵Ha dikabi hatiritū Pērgamo anushū Nicolaū hatu yusītxakani txibākī putabumariki. ¹⁶Mā hatiri haskabia Deus mā txibākatsis ikairā, matū txakabu henetā matū xinā betsa watā Deus anu berikāwē. Tsuara haskabumakē samama hatu anu kashū habū txakabuwaibu kupikī na ē nupe txaipe ē hashpanu ē tukuāwē ē hatube detenamei kashanai. ¹⁷Mā pabīkiyabunā, Yushī Papatū ha mā itxamisbu matu yuiyai nīkakāwē: Tsuabūra ea danāma habū maemakī binumisburā, pewē kupikī misi naiuria Deusū hunemis ē hatu pimashanai, nai anu unānuma ebe hatu hiwemakinā. Ha inū, kena bena nēkati hushupaki hatū kena nea ē hatu ināriashanai. Ha habū biaibū besti ha kena unāshākanikiki, tsua betsā unātirumarā’ ”, ea washu ē matu keneshunai.

Tiatira anuabu keneshū hatu bumanikiaki, na hātstarā

¹⁸Ana Jesusū ea yuikī: “Hatū Deusū hātxa yuinika Tiatira anu itxamisbu mekea na hātxa ē mia yuiyai keneshūriwe: ‘Ē Deusū bakē, na ē beru txi here txasha keska inū na ē tae mane taxipa betsa hawē kena latāo reluzente dēke dēke aka txashahaira keskayatū ē matu yuiyai nīkakāwē. ¹⁹Haska matū xinā pepa hayashū ea txibaī mā hiwekūkainai ē unaiī. Haskakē nuinamekī ea ikūwai txītuāma ea txibākī ea duawanū, iwanā, hamapai betsa betsapa pepa mā akī taewani mā binumai ē unāriai. ²⁰Mā haskabiai eska besti matu anu hayaki. Ha aību mā Jezabel wamis hatū txakabuwaikiri mā nemaisma ha bestikiri matu yuinū nīkakāwē. Ha Jezabelī matu parākī yuikī: Eāri Deusū hātxa ē yuimiski. Ea nīkakāwē, matu watā mā ē tsumabu bestibu matu itxawashū yusīkī yuikī: Aību mī aīmabe mī txutanamearā, peki. Huni mī benemabe mī txutanamearā, periki. Hamapaipe txutanamearā, periki, akī pitikiri matu yuikī: Ha yushī dami betsa kēwāti nami ināmisbu mā piarā, hawa txakabumaki, iwanā, matu parākī matu txakabuwamakubaimiski. ²¹Hamē hau Jezabelī hawē txakabu henekī hawē xinā betsa wanū ishū ē manakabia xinā betsa wakatsi ikama hawē kemu txutanametikiri henekatsi ikamaki. ²²Haskakē kupikī ē isī txakabu tenemashanai. Ha inū, ha aību Jezabel inū dasibibū ha txibaī habe txutanamei

atimapamisbũ ã yusã danãkĩ hamapai txakabuwẽ kemumisbu bikahaira ã hatu tenemashanaii, habũ hawẽ yusã danãbumarã. ²³Ha inũ, ha aĩbũ hãtxa nĩkamisbu tenãkĩ ã hatu yamawashanaii. Ë hatu haska waya dasibibũ xinã inũ habũ huĩti ã unãhairamis habũ ea ikũwãkĩ txibãmisbũ txanima unãshãkanikiki. Ha inũ, hatiribũ haska hiwea abumisbu unãtã pepabu pepawẽ hatu kupikĩ txakabubu txakabuwẽ ã hatu kupishanaii. ²⁴Hamẽ Tiatira anushũ ha aĩbũ yusã danãkĩ Satanásã xinã hunea hawẽ kuxipawẽ dayanũ ishũ hatiribũ mã unãkatsi ikabumarã, mã pekẽ matukiri ã ana hãtxa hayamaki. ²⁵Hakia na besti matu yuinũ nĩkakãwẽ. Deusũ yusã mã haya ha txibãkĩ henepakeyamashãkãwẽ, ã ana kayushanairã. ²⁶Tsuabũra ea danãma txakabu maemakĩ binumisburã, hawa heneama haska ã abuai apakemisburã, hanu ã ana huai anu ã hatu shanẽ ibu wakĩ kuxipa washanaii, hau nawa shukuabu mekenũbunã. ²⁷Haska ã Epã ea yunua ã habe shanẽ ibumis keska wakĩ shanẽ ibukĩ ea txibãkubaĩmisbũ hatu mekebiabu ã hãtxa nĩkaisbuma mane mestẽti tsumashũ mã hatu yamawashanaii, haska mai kãti wamistũ hawẽ kãti txakabu pusamis keska wakinã. ²⁸Ha dikabi pena bixi txashamis keska ã matu inãshanaii. ²⁹Mã pabĩkiyabunã, Yushĩ Papatũ ha mã itxamisbu matu yuiã nĩkakãwẽ ”, ea washu ã matu keneshunaii.

Sardes anuaburi keneshũ hatu bumanikiaki, na hãtxarã

3 ¹Ana Jesusũ ea yuikĩ: “Hatũ Deusũ hãtxa yuinika Sardes anu itxamisbu mekea na hãtxa ã mia yuiã keneshũriwe: ‘Ha sete Deusũ Yushĩ ã haya inũ ha sete bixi ã tsumashũ ã mekeatũ ã matu yuiã nĩkakãwẽ. Haska mã hiweshũ hatu kaka hawẽrua nĩkamabiai uke merã mã mawa keskabu ã matu unaiĩ. ²Hanua haska Deusũ matu xinãmakĩ hawẽ hãtxa matu txibãmakatsis ikai txibãkĩ mã keyuriamahaira unãkĩ matu yununũ nĩkakãwẽ. Ë hãtxa unãhairabiãkĩ mã akĩ pewamaki. Ana txibãma mã hakimãkĩ mã ma heneãii, mawai keskairã. Mã tsuabura haskarã, usha besteĩ keskatã matũ huĩtinĩ xinã mestẽwãtã ana ã Deus txibãhairakubaĩkãwẽ. ³Hanushũ Deusũ hãtxa yusĩnãbũ matu yusiabu mã nĩkani xinãkãwẽ, xinã betsa watã ana txibã taewakinã. Hamẽ mã ea nĩkakatsi ikabumakẽ yumetsu hune humis keskai mã ea manatxakaya hatiara eari hune hushũ ã matu datetuxishanaii. ⁴Habiaskabiãkẽ hatiri Sardes anuabũ hawa txakabuwakĩ mã kaneisbumaki, matũ tari detsis keska wamarã. Haburã, ebetã tari hushupa sawea ebe mapushãkanikiki, haska habu pepakĩ binumisburã. ⁵Tsuabũra ea danãma habũ maemakĩ binumisburã, tari hushupa saweshãkanikiki. Ha dikabi hatũ kena Deusũ hiwemati una anua ã tere akama ishanaii. Hanushũ ã Epã inũ hawẽ nai tsumabu bebũ hatu nitxĩtã ã habu hatu unãmashanaii. ⁶Mã pabĩkiyabunã, Yushĩ Papatũ ha mã itxamisbu matu yuiã nĩkakãwẽ ”, ea washu ã matu keneshunaii.

Filadélfia anuabu keneshū hatu bumanikiaki, na hātcharā

⁷Ana Jesusū ea yuikī: “Hatū Deusū hātcha yuinika Filadélfia anu itxamisbu mekea na hātcha ē mia yuiiai keneshūriwe: ‘Ea ē meribi inū ē txanimahaira Davi kuxipa ini keska binua hawē bepēti chave ē hayaki. Tsuāra ha mae bepeā tsuā beputiruma inū ha mae bepuā tsuā bepētirumaki. Haska mekeatū ē matu yuiiai. ⁸Eānā, dasibi mā akubainai ē unaii. Uikāwē. Matu bebū matu anu beputi bepēmana keska hawa tsuā matu bepūtiruma ē matu bepēshunaki. Haskawē taea mā txītuāma ē hātcha txibākī mā kuxipa mirī hayabia eki dakeama hatu yuikī: Ē Jesusunabuki, mā imiski. ⁹Ha inū, judeubu betsabu haska Deusū abuai akambia hātchawē besti yuikī: Nū judeubuki, ibiakī Satanás txibākī haska abuai ashūi hiwemisbu judeubu kayabibumarā, ē matu abuhairamis hau unānūbū hatu babu watā matū tae namā ē hatu dāti imashanai manayukāwē. ¹⁰Ha inū, itxakanikatū mai hirabi anu dasibi maniabu hatu bika tenemakī itxakawaya mā Filadélfia anuabū ē yusīa hātcha txibākī hawa mā heneismakē matu merabewakī hawa putama ē matu keshekubaīshanaii. ¹¹Ha inū, matū pepa hawē kupiti hau tsuā matu biābaīyamashanū ē yusīa xinākī txibākī heneyamakāwē, ē samama ana txītūkirāshanairā. ¹²Tsuabūra ea danāma habū maemakī binumisburā, hanu ē Epa Deusū hiwe anu hawē txibu betsa keska tsuā betsetiruma keska ē matu washanaii. Hanua mā hani ana kaībaīnama inūbariaii. Haska inū, ē Epa Deusū kena matuki kenekī netākī hawē mae Jerusalém Bena ha mae nai anua butushanai hawēri matuki kenekī netākī ē kena benari ē matuki netāshanaii. ¹³Mā pabīkiyabunā, Yushī Papatū ha mā itxamisbu matu yuiiai nīkakāwē’ ”, ea washu ē matu keneshunaii.

Laodicéia anuabu keneshū hatu bumanikiaki, na hātcharā

¹⁴Ana Jesusū ē João ea yuikī:

“Hatū Deusū hātcha dayashunika Laodicéia anu itxamisbu mekea na hātcha ē mia yuiiai keneshūriwe. ‘Dasibi Deusū hakiri yuiiai ē Habiaskaki, imistū mai hirabi inū nai hirabi damiwakī ewē Deusū ani txanima hātcha besti txani ē kaneismatū ē matu yuiiai nīkakāwē. ¹⁵Mā ea txibāhairama inū ea danāhairakubainama mā xinā bekashnaiibu ē unaii. Haskatimaki. Tsuabūra ea txibākatsis ikī hau ea txibā kayabinūbūwē. Hakia tsuabūra ea txibākatsis ikabuma danākī hau ea hene kayabinūbūwē. ¹⁶Hamē tsuabura ekiri xinā bekashnarabei maniabuwē taeshū hanaī keskakī ē matu putashanaii. ¹⁷Haska inū, matūmebi xinākī yuikī: Mabu itxapa haya pei itxapa haya dasibi ē hayaki, ikī mā xinābiakī ē yusīa xinākī mā txibābumawē taea mā ibubis nuitapai hawa hayama bekū tariuma keska mā hiwekūkainaii. ¹⁸Hamē tsuabura mā pepakatsis ikaibu matu yusīnū nīkakāwē. Dasibi pepa has mā hayakatsis ikairā, ouro txiwē kuakī has

wa mā bikatsis imis keskakĩ ã yusĩa kayatapia ea anua bikãwẽ, hawẽ kemutapatirã. Ha inũ, matũ yura mã hawẽ dakeai hunenũ ishũ tari sawea keskakĩ matũ txakabu ea buamanũ ishũ tari hushupa ea anua bia keska wakĩ matũ txakabu henetã ea txibãkubaĩkãwẽ. Ha inũ, uĩ pewanũ ika beru daũwẽ ika keskakĩ ã yusĩawẽ matu kaya watiru ea anua biriakãwẽ. ¹⁹Ha inũ, dasibi mã enabuwẽ nuikĩ matu merabewa bestinũ ishũ hãtxa kuxipawẽ matu ha akĩ ã matu yusĩshuwẽ taeshũ ã yusĩa nĩkakĩ pewatã matũ xinã betsa watã xinã txãkãhaira bestikũkaĩkatsis ikirã, Deus anu berikãwẽ. ²⁰Uĩa. Matu tibi haibuwakatsis ikĩ matũ beputi keska matũ huĩti anushũ eã ã matu kenakĩ akawaii. Tsuãra ã hui nĩkatã ebe haibunamekatsis ikĩ beputi keska matũ huĩti mã ea bepẽshuna matũ hiwe anu hikitã ã matubetã pikatsis ikaii. ²¹Tsuabũra ea danãma habũ txakabu maemakĩ binumisburã, hatu manakukĩ ea dapi tsaumakĩ ã hatu shanẽ ibumashanaii, haska eã ã binu keyuni ã Epa dapi tsauwa ã habe shanẽ ibuni keska wakinã. ²²Mã pabĩkiyabunã, Yushĩ Papatũ ha mã itxamisbu matu yuiã nĩkakãwẽ’”, ea washu ã matu keneũshunaii.

Nai anushũ Deus kẽwaĩbu Joãonẽ uĩnikiaki, na hãtxarã

4 ¹Haska nĩkaxina inũ hati uĩshu naiuri besushũ beputi bepeã uĩtã hui trombeta mimawati kuxipa keskawẽ hawẽ dukũ Jesus hãtxai ã nĩkaxina ana habiãwẽri ea hãtxa wakĩ yuikĩ: “Ea anu inayuwe, mĩ inakẽ haskarara ana betsa betsapa inũbariai ã mia uĩmairã”, ea watã ²hawaira ea betsa watã ã yushĩki dasitã ea uĩma nai anu inashũ ã uĩshu matu yuinũ nĩkakãwẽ. Hari Shanẽ Ibu haki tsautiki nukũ Epa Deus tsauwa ã uĩshuki. ³Ha tsauwa hawẽ yurarã, jaspe keska kasmai sardõnica keska nẽkati karuhaira txashahaira bakamana bakamana ikaya hawẽ tsauti kesukawana namakis nawã bai tapia esmeralda nẽkati nãketapa keska txasha txasha ikikiki. ⁴Hanua Deus shanẽ ibu haki tsauti anu 24 tsauti betsa hanu serebauna uĩkĩ 24 mekenikabu habu haki tsauwabu tari hushupa sawea shanẽ ibũ ouro mane maiti maiabu ã uĩayã ⁵Deus hanu tsauwa anua kana bakatã tĩ ikaini dãka ikainaya Deusũ besuuri hawẽ merabenã yushĩ sete nãparina bĩ dekua nitxĩbauna txasha keskabuki. ⁶Haska inũ, tsauti besuuri iãnẽwã beshnãhaira bakamanaya ha dapi hiweabu dabe inũ dabe ha tsauti anu mapubauna habũ besuuri beru sãkã daka inũ hatũ petxiuri beru pesãkã dakabu ⁷ha dukũ inu ewapa betsa hawẽ yura leão keska ha katxu ina awa bake keska ha katxu betsa hunĩ besuya keska ha katxu betsa tete ewapa nuyai keska ⁸hatibu seis pũyã peiya habũ yura hirabi hawẽ berunati txasha dakabũ bariri inũ mexu merã Deus kẽwãkĩ habũ heneisbumã yuikĩ:

“Mĩ pepahairaki.

Mĩ dasibi kuxipa binuaki.

Mai hayariama nukũ Shanẽ Ibu Deus

dasibi kuxipahaira hiwea haya inū,
natiā hiwekūkainai inū,
ana mī butushanai nū unaiī”, ikī

⁹Deus niti ikama hiwea ha dabe inū dabe hiweabū hamapai pepa hakiri xinākī hawē pepakiri yuikī kēwaībū ¹⁰ha 24 mekenikabū kēwāriakī dāti ishū shanē ibuhairawakī habū hatū ouro mane maiti mabikitā inākī hawē tae namā mātxitā yuikī:

¹¹“Dasibi damiwakī
mī xināwē hamapai dasibi mī damiwani
mī nukū Shanē Ibu inū
mī nukū mekenika yushī Deuski.
Haskawē taeshū mia besti kēwākī
nū mia duawakubainai”,

akaibu uīkī ē matu keneshunaii.

Txashuwā bakē una sebi keneya txurenikiaki, na hātcharā

5 ¹Hanushū ē nīkaya una sebi kene dabeya uke merā inū bemaki keneya sete hawē tsamia tsuā hune mekī bepētiruma inū txureriama unātiwē tsami dakabirana Deus hawē tsautiki tsaushū hawē mekē yusiuriawē tsuma ē uīayā ²nai tsuma kuxipatū uībaūkī hui kuxipawē habu yukakī:

“Tsua pepa kuxipahairatū atirumē? ha una tsamia tibi dashnukī hatū txureairā”, hatu wa ³hakia nai anu inū, mai anu inū, hanu mawabū yushī maniabu anu tsua pepahaira hayamakē tsuā txureshū uītirimakē ⁴txanima tsua pepa kuxipa hushū txureshū uītirimawē taea nui ē kashahairaya ⁵mekenika betsa ea yuikī: “Kashayamawe. Shanē ibu Davī baba betsa ha Judā baba yuinaka dasibibū shanē ibu inu betsa hawē kena leão nū dabimis pepa kuxipahairakī haki sinataibu maemanitū ha unāti tsamia tibi hatū dashnu dashnu akī keyutā ha una txuretiruki. Manayuwe”, ea waya

⁶hanushū Deus tsauwa naxui ika namakis ha hiweabu dabe inū dabe mapubaunabu inū habianuri ha 24 mekenikabu tsaubaunabu anu ha namakis naxui ika txashuwā bake hawē yura txatxinibu mawa keska nia sete mashūyā inū sete beruya ē uīshuki. Txashuwā bake hawē sete berurā, ha hawē yushīwē mai hirabi anu Deusū hatu yusīmakubainairā, haska ē uīshuki. ⁷Hanushū txashuwā bake ha Deus hanu tsau anu kemashū hawē mekē yusiuri anua una sebi bitā tsumakē ⁸hanua benimahairakī ha hiweabu dabe inū dabe inū, ha 24 mekenikabū hatū mimawati betsa hawē kena harpa inū ouro mane kētxa ni pei inīti ha kuashūti keska mata haska hawenabu Deusbe hātksamisbu tsumashūri habu dasibibū txashuwā bake kēwai haki dāti itā ⁹dasibibū nawati bena huiwē nawakī yuikī:

“Mī pepahairaki.

Mawakī mī himiwē yura shukuabu tibi anua inū,
nawa tibi anua inū,
hātxa tibi anua inū,
mai pakea tibi anua Epa Deus bishūkī
hawenabu hatu wakī

¹⁰ Deusbe hātxashunikabu mī ma hatu waniki.

Deusbe hanu shanē ibushanaibu hatu wanishū
mai anua habu shanē ibushākanikiki.
Haskakē miā besti Deusū una bishū mī txuretiruki.
Mī pepahairaki”, akaibū

¹¹ hanushū ana uīkī ē nīkaya ha hiweabu inū ha mekenikabu inū
nai tsuma mirimahaira Deus shanē ibu haki tsauti dapi manibaunabū

¹² hātxa kuxipawē habū yuikī:

“Txashuwā bake deteabu
ana bestēni pepa kayabirā,
hatū besti bitiruki, kuxiparā, pepa tibirā,
unānepahairarā, shanē ibu kuxiparā.
Duawai xinā txākai benimawakī nū ha kēwaii”,

ikaibū

¹³ hanushū ana ē nīkaya ha dasibi Deusū damiwakī hatu hiwemani nai
anushū inū, mai anushū, inū mawabu yushī bumisbu anushū, inū iānēwā
anushūri habū kēwāriakī yuikī:

“Ha Shanē Ibu haki tsauti anu tsauwa inū
txashuwā bake hatu duawakī xinā txākāwākī
hawē benimawatiwē hau shanē ibuhaira wakubainūbūwē, niti
ikamarā”, ikaibū

¹⁴ ha hiweabu dabe inū dabe bū habiaskari xinākī kemakī:

“Habiaskaki”, iriaibū ha 24 mekenikabu dāti iki beti itā kēwāriaibū

**Ha dukū dabe inū dabe hawē unāti tsamia Jesus
Cristō dashnukī taewanikaki, na hātstarā**

6 ¹ hanushū Deusū txashuwā bakē hawē unāti ha dukū tsamia
dashnuaya ha hiweabu dabe inū dabe betsā hawē hui tī ikaikainai
keskai uīkī ē nīkaya hatū yuikī: “Huwe”, akai

² ē uīayā hanua cavalo hushupaki tsuara kanūyā katsauwa shanē ibū maiti betsa
Deusū inā maia hunibube detenamekī binumakī hatu maemakeakebaini kakē

³ hanushū Deusū txashuwā bakē hawē unāti tsamia ha segundo dashnuaya ha
hiweabu betsā yuikī: “Huwe”, akai ⁴ ē uīayā hanua cavalo betsa taxipaki tsuara
betsa haki tsaukaikī kuxipa bibaīkī hau mai hirabi anu tsuabura ana unānuma
hiweama hanubi hau detenamebaunūbū nupe txaipa inātā yunua kaya

⁵hanushū Deusū txashuwā bakē hawē unāti ana ha terceiro tsamia dashnuaya hiweabu betsa kenakī yuikī: “Huwe”, akai ē uīayā hanua cavalo betsa mexupa tsuara betsa hawē shākama unāti tsuma haki tsauwa ⁶ha hiweabu dabe inū dabe anua ha hātxa kaīmakī yuiāi ē nīkaya: “Piti yama tukātiā shekiwā ha misi wati kilo bestitxai hawē karu shekamakī shaba bestitxai daya pei wakubaīwē. Ha inū, misi wati betsa cevada pe beshmas kilo dabe inū besti hawē karu shekamakī shaba bestitxai daya pei wakubaīwē. Hakia piti sheni inū uva vinho ana karu wayamakubaīwē”, aka kaya

⁷hanushū Deusū txashuwā bakē hawē unāti ana ha quarto tsamia dashnuaya hiweabu betsa yuikī: “Huwe”, akaya ⁸ē uīayā hanua cavalo betsa paxī beshunaki tsuara betsa hawē kena Mawamanika haki katsauwa inū hanu mawabu bumisbu habū shanē ibu hatxū huai ē uīayā Deusū mai hirabi anuabu yurabu shukua tibi habu anua pashkakeakekī ha dabe shanē ibu watā ha quarta parte hatu inākī kuxipa wakī yunukī nupewē hau detenamenūbū inū, buniwē hau tenāmanūbū inū, isī betsa betsapawē hau tenāmanūbū inū, yuinaka pubēbū hau hatu pimanūbū ha kuxipa inā bibainaya

**Ha quinto inū sexto hawē unāti tsamia Deusū
txashuwā bakē dashnunikiaki, na hātcharā**

⁹hanushū Deusū txashuwā bakē hawē unāti ha quinto tsamia dashnuaya habū Jesus ikūwākī Deusū hātxa Jesuskiri yusīkubaini bika betsa betsapa tenebiai txītuābuma hatu tenābu txi tapu fogāo hanushū Deus kēwākī inākuīti hanushū kuamisbu anu ha namā ha pepabū yushī datābu ē uīayā ¹⁰habū hātxa kuxipawē yuikī: “Mī nukū Shanē Ibu binu keyua meribi mī txanima kayabiki. Haskakē mai anushū habū nuku tenāniburā, hatiā mī hatu unāti watā hatu nuku kupishūshanai?” akabu

¹¹yushī datābu Deusū hatu yuikī: “Maturā, huīrukūyukāwē. Ikismaki. Ē tsumabu betsa matu keska ea dayashūmis haburi hau tenāyunūbūwē. Habū matu tenāmis keskariwakī ē hatu kupishanai manayukāwē”, itā habu tibi pepawē kupikī tari hushupa txaipe hatu inākī sawemakī keyuaya

¹²hanushū Deusū txashuwā bakē hawē unāti ha sexto tsamia dashnuaya ē uīayā patxa sakuhairai bari nukai mexua tari mexupa keska dakakē usheri himi keskai taxia dakakē ¹³hanua niwe birenepā hi bimi huxīriama niri amis keskai bixi tsekebirani mai anu niri iake iakeaibū ¹⁴hanua nai yamakaini una sebiki ikaskainaya mati inū hene anu mai natukā maeakei shekekaunaya ¹⁵hanua mai hirabi anua shanē ibuhairabu inū, soldadobu shanē ibubu inū, mabuwāyābu inū, yura kuxipabu inū, dasibi hatū hatu dayashūmisbu inū, yura tsuā tsumama dasibi hatibu datei mai tāpe inū mixkipāwā mati hanu hunenū ika bushū ¹⁶haki hunenū ishū mati inū

mixkipāwābu yuikī: “Hanu kupi ma hua tsuã nematirumaki. Epa Deus hawē shanē ibū tsautiki tsauwa inū hawē bake txashuwā bake nukuki sinataiwē taea nuku hunei nukuki di irikāwē. ¹⁷Ma ha shaba hanu Deusū hatu kupiaitiā ma hua tsuã ana nematirumaki”, akeakeaibū

**Deusū bebūkiri hawenabu katuni hawē nai
tsumabū habu unāti wanikiaki, na hātstarā**

7 ¹ha binukainaya hanushū ana uīkī nai tsuma dabe inū dabe mapuakeakeabu ē uīayā betsa bari huaikiri leste anu nia betsa bari hikiaikiri oeste anu nia betsa norte anu nia betsa sul anu nia habū niwe dasibi tsumashū nemakī mai inū iānēwā inū hi mapua hau niwe hanu shūku ikī hau itxakawayamayunūbū ²hanua nai tsuma betsa bari huaikiria lestekiria hukī nukū Epa Deus hiweatū hawenabu unāti washūti hayatū hui kuxipawē ha nai tsuma dabe inū dabe habu kuxipa mai inū iānēwā daūti hayabu hatu ³yuikī: “Meyamayukāwē. Deusū tsumabu habū betūkuki netākī habu Deusunabu nū unāti wariamakē mai inū iānēwā inū hi mapua itxakawakī daūyamayukāwē, Deusunabu hau mawayamayunūbunā”, hatu wa

⁴haska wakī 144.000 Israelī 12 huni bakebū bababu shukuabu Deusū hawenabu hawē betūkuki hawē unātiwē unāti wakī yura betsa betsapabu katukī

⁵Judā bababu 12.000 hawenabu wakī unāti netākī
Rúbenē bababu 12.000 habiaskari wakī
Gadē bababu 12.000 habiaskari wakī

⁶Aserī bababu 12.000 habiaskari wakī
Naftalī bababu 12.000 habiaskari wakī
Manassésī bababu 12.000 habiaskari wakī

⁷Simeāonē bababu 12.000 habiaskari wakī
Levī bababu 12.000 habiaskari wakī
Issacarī bababu 12.000 habiaskari wakī

⁸Zebulomnē bababu 12.000 habiaskari wakī
Josē bababu 12.000 habiaskari wakī
Benjamimnē bababu 12.000 habiaskas wakī
Deusū hatu unāti wakī katumai ē nīkashuki.

**Nai anushū hati tsuã tanatirumabū tari hushupa
saweabukiri yuinikiaki, na hātstarā**

⁹Hanushū ana uībaūkī yurawā hati tsuã tanatiruma ē uīshu matu yuinū nīkakāwē. Nawabu mai pakea tibi anuabu inū, yura betsa shukua tibi anuabu inū, dasibi hātxa tibi anuabu inū, mae tibi anuabu Deus shanē ibu haki tsauti inū txashuwā bakē besuuri habu nishū tari hushupa txaipa saweshū shēpā tsuma nishū ¹⁰hui kuxipawē habū yuikī:

“Nukū Epa Deus shanē ibu haki tsauti anua inū hawē bake txashuwā
bake nukū meketirā, habuanuaki”,

ikaibū ¹¹ dasibi Deusū nai tsumabu inū, habu hiwea dabe inū dabe inū, ha
24 mekenikabu hatibu shanē ibū tsauti anu mapubaunabu Deusū besuuri
maī beti ishū kēwākī ¹² yuikī:

“Nukū Epa Deus unānēpa Shanē Ibu kuxipahairaki.
Benimawakī hawēruawakī kēwākubainākāwē, niti ikamarā.
Haskakirā”,

ikaibū

¹³ hanushū mekenika betsā ea yukakī: “Na tari hushupa saweaburā,
tsuabumē? Hania beabumē?” ea wa ¹⁴ kemakī: “Shanē ibuū, mī
miā unai”, ē wa hanushū mekenikatū ana ea yuikī: “Txanimaki.
Itxakawanikatū yura dasibi mai hirabi anuabu bikawakī hatu
nuitapawaya yurabū hatū txakabu henekī habū tari detsis keska
txashuwā bakē himiwē txukakī habū detsis yamawakī habū tari hushu
pehairawabuki.”

¹⁵ “Jesusū haska wakī na mapubaunabu hatu pepawa
Deus shanē ibu haki tsauti anu manishū
mexu merā inū bariri Deus hanu hiwea anushū
duawakubainaibu Deusū habu mekekubaishanikiki,
xinā txākaiburā.

¹⁶ Haria ana nuitapai buni ūpash manui ikama inū,
barī ana hatu kuama inū,
shana bakakī ana hatu bikawama ishākanikiki.

¹⁷ Ha inū, txashuwā bake Deus shanē ibu haki tsauti namakis niatū
ūpash paisma pehaira txatxa hene hawē hiwemati haya anu hatu
iyushū amai
hatū mekenā ishanikiki.
Hanushū ha kashamisbu
Deusū hatū beru beū hene dasibi tashka washanikiki”, ea wa

Hawē henekī sétimo tsamini dashnunikiaki, na hātstarā

8 ¹ hanushū Deusū txashuwā bakē ha sétimo hawē unāti hawē henekī
tsamini dashnuaya hanua Deusū mae anua dasibi meia hora nixma
dakatā binukainaya

² hanushū ha sete nai tsumabu Deusū besuuri mapuabu habu tibi
mimawati trombeta hatu inai ē uīayā ³ nai tsuma betsā ouro mane kētxa
tsumatā Deus kēwākī hawē inākuīti hanu hanati tapu anu Deus shanē
ibu haki tsauti besuuri ka nia habū Deus kēwaibū hāttxa duapa inītibe
husishū hanu kēwāti tapu anu hau mātxinū ni pei inīti pepa ha abumis
itxapa nai tsumā inā ⁴ bishū nai tsumā hawē mekēki tsumashū ha inīti
inū ha Deus yukamisbu txi dekē matsistua menui hawē kuī inī pehaira

inabainaya ikūwaībū hātxa duapa Deus yukamisbu ha kuīyābi husia inariaya ⁵hanushū nai tsumā ouro kētxa ana tsumashū txi dekē hanu kēwāti tapu anua beakī mata washū mai anu urēkī sa aka haria kana baka baka itā tī ikaīkaini patxa sakuaya

⁶hanushū ha sete nai tsumabu habiatitūri trombeta habū mimawati mawanū, iwanā, tsumabū

Dabe inū dabe trombeta mawakī txā anibukiaki, na hātcharā

⁷ha nai tsuma betsa ha dukū primeirō hawē trombeta txā akī taewaya mai pakea tibi anu niri iake iakekaūkī barush ui inū txi ha dabe himiyabi husia Deusū puta mai pakea tibi anu kuakī ha pakea betsa anu kawākī ni inū ni mashu terça parte kuakī basi nāke dakayabi dasibi kuakē

⁸hanushū nai tsuma ha segundō hawē trombeta txā akaya tsuāra iānēwā hatiubukūs watā pake dabe inū besti habiatuibus wakē mati ewapa menuai keska iānēwānu Deusū puta pukukī iānēwā pakea betsa himiwaya ⁹ha habias pakea iānēwā merā hiweabu mawaibū ha pakea anu shashuwā nesheaburi muxi muxi ikaya

¹⁰hanushū nai tsuma ha terceirō hawē trombeta txā akaya hene inū txatxa mai pakea betsa tibi anu bixiwā here hi iki bī dekua keska txashahaira nai anua kawani terça parte mai anu inū hene betsa anu inū txatxa anu tī iki kawanaya ¹¹ha bixiwā hawē kena Muka mai anu tī ikī mai pakea tibi anu hene terça parte ūpash mukahairawakē yura itxapabū ha ūpash aki mawaibū

¹²hanushū nai tsuma ha quartō hawē trombeta txā akaya tsuāra bari inū ushe inū bixi habū txasha kuxipa hatiubukūs watā pake dabe inū besti habiatuibus wakē nai tsumā pakea betsa itxakawakī shaba betsa tibi bari nukawakī mexu tibi ushe inū bixi nukawakubainaya

¹³hanushū ana uīkī ē nīkaya tete ewapa nai natukanu nuyakawākī hunī hui kuxipa keskawē yuikī: “Huaai, huaai, nai tsuma dabe inū bestitū habū hatū trombeta hawaira txā akaya dasibi na mai anu hiweabu nuitapai yumāshākanikiki”, ikaya

Quinto nai tsumā hawē trombeta mawakī txā anikiaki, na hātcharā

9 ¹hanushū ha quinto nai tsumā hawē trombeta txā akaya bixi keska mai anu kawani tī ika ē uīyā mai kini keyatapa shākīhaira hanu yushī txakabu hiweabu anu hawē bepēti chave ha bixi keska Deusū nai tsumā inākē ²bixi keskatū hawē kini bepēyā hanua txi kuī mirima bai ewapa kua keskai mexu tuenabaīkī bari inū nū hawē huīsinamis mexu waya ³kuī puebainai nakui xinīwā mirima mai anu pai butuabu nibu keska wakī Deusū hatu paepawakī pubēwākī ⁴yunukī: “Mai anushū basi piama hamapai mibā xarabu piama hi piama yurabu habū betūkuki Deusunabu hawē unāti netābuma besti pikī hatu itxakawakubaītākāwē,

⁵cinco ushe hatu isĩ tenemabiakĩ tsua tenãmarã”, hatu wa bushũ yurabu itxakawakĩ nibu keskakĩ hatu pikĩ hatu isĩhaira tenemakubainaibũ

⁶ha hatu haska waitiã yura mirimabu isĩ tenei mawakatsis ibiai huĩti shukubiai mawabuma ishãkanikiki.

⁷Ha xinikiri matu yuinũ nĩkakãwẽ. Habũ yururã, cavalo hawẽ detenametanũ ishũ pewamisbu keska inũ, shanẽ ibũ ouro mane maiti maia keska inũ, habũ besu huni kuĩ besu keskaki. ⁸Ha inũ, habũ bu aĩbũ bu keska inũ habũ sheta inu pubẽ leãonẽ makushpi txaipa keskaki. ⁹Ha inũ, habũ yura atximati mane kuxipahaira sawea inũ habũ pũyã peiwẽ nuyai cavalo mirimatũ hawẽ tarãbaĩtiwẽ tarãbaĩkĩ detenameibu iyui banabainaibu keskabuki. ¹⁰Ha inũ, habũ hina nibu hina keskawẽ yurabu pikĩ hatu txakabuwa ushe mekẽ bestiti isĩ tenekubaishãkanikiki. ¹¹Ha inũ, xinĩ shanẽ iburã, ha kini keyatapahaira hatũ yunumis nai tsumaki. Hawẽ kena Hebreu hãtxawẽ Abadomki. Ha inũ, hawẽ kena Grego hãtxawẽ Apoliomki. Ha inũ, hãtxa kuĩwẽ kenarã, Yamawanikaki.

¹²Hanua ha dukũ mesehaira atimapa keyukainaya hanua dabe tashniriama hayayuaki.

Sexto nai tsumã hawẽ trombeta mawakĩ txã anikiaki, na hãtxarã

¹³Ana ha sexto nai tsumã hawẽ trombeta txã txã akai ã nĩkaya Deusũ besuuri ha Deus kãwãti ouro mane tapu anu ha dabe inũ dabe deshũ tibi haki mani tximei txãkã tsamia anua hui tashni hãtxakĩ ¹⁴ha nai tsuma trombetaya yuikĩ: “Ha nai tsuma dabe inũ dabe heneuwã Eufrates dapi neshea pekatã hatu nitxĩriwe”, aka ¹⁵haska was ha nai tsuma dabe inũ dabe hatu peka mai hirabi anu yura tibi manibaunabu hau na habia hora inũ, dia inũ, ushe inũ, ano terça parte hau hatu tenã atanũbũ nai tsuma betsa ha nai tsumabu dabe inũ dabe hatu nitxiã tashnibainaibũ ¹⁶habũ soldadobu cavaloki katsaũwãburã, duzentos milhõesti yuikãshu haskashanaibu ã matu keneshunaii.

¹⁷Ë nama keskatã haska ã uĩshu inũ haska ã nĩkaxina matu yuinũ nĩkakãwẽ. Huni tibitũ hawẽ shutxi atximati mane taxipa txi keska inũ, nãketapa jacinto keska, inũ paxinipa enxofre keska saweabũ habũ cavalo bushka inu leão bushka keska hayabũ hawẽ hashpa anua txi inũ, kuĩ inũ, enxofre paxinipa kui tashnibainaya ¹⁸dabe inũ besti pakea anu yurabu ha dabe inũ besti isĩ txakabu ha cavalo hashpa anua kaĩkaĩkĩ txi inũ, kuĩ inũ, enxofre kaĩkaĩkĩ hatu tenã keyukẽ ¹⁹ha cavalo hawẽ hina dunu keskaki, hawẽ hina inũ, hawẽ dekĩ inũ hawẽ sheta paepawẽ yurabu hatu txakabuwairã.

²⁰Hakia ha yura tesheabu isĩ txakabuwẽ habu mawabuma habũ txakabuwakubaĩkĩ heneama yushĩ txakabu kãwãkĩ heneabumariki. Ha inũ, yushĩ dami betsa ouro mane inũ, prata mane hushupa inũ, bronze mane taxipa inũ, mixki dami inũ, hi dami ha dami betsa betsapabũ uĩtiruma inũ, nĩkatiruma inũ, maputiruma kãwãkĩ heneabumaki. ²¹Ha

dikabi detenamei heneabuma inũ, yushĩ txakabũ shuũ itiwẽ daunãnai heneama inũ, huni inũ aĩbu betsa betsapabube txutanamei heneama inũ, yumetsui heneama txakabupakeshanaibu ẽ Joãonẽ haskashanaibu ẽ uĩshuki.

Una pixta sebi bepemana nai tsumã benikiaki, na hãtxarã

10 ¹Hanua nai tsuma kuxipa betsa nai anua butuai ẽ uĩshu matu yuinũ nĩkakãwẽ. Hawẽ yura nai kuĩnẽ yabua inũ, hawẽ bushka nawã bai tapia keska inũ, hawẽ besu bari keska txasha inũ, hawẽ bikerã txi dekẽ keskaki. ²Ha inũ, una pixta sebi bepemana tsumabirana hawẽ tae txixabukõtã hawẽ tae yusiuri iãnẽwã bepaia inũ hawẽ tae yusmauri maiki paiaiki. ³Ha nai tsuma sai iki inu leão pubeĩ tekerẽ imis keskai hui kuxipawẽ sai ikẽ hanua seteki hui tashni tĩ ikaĩkaini keska ẽ nĩkaxinaki. ⁴Hawẽtxaĩs seteki dẽke iki betsa betsapai hãtxa nĩkatã hawẽ hãtxa kenẽnũ ishũ ẽ pewaya naiurishũri hui betsawẽ tsuãra ea yuikĩ: “Ha hawẽtxaĩs ha seteki dẽ iki betsa betsapai mĩ nĩkabiashurã, ha keneama hunewe, tsua yuiyamarã”, ea waya

⁵hanua ha nai tsuma iãnẽwã bepaia inũ mai anu paia hawẽ mekẽ yusiuri naiuri sanãtã ⁶ha hiweibi hiweni hiwea hatũ nai wani inũ mai wani inũ iãnẽwã wani dasibi habu hawẽ hiwebaunabu hakiri hãtxa betsa watimakiri yuikĩ: “Bari hawẽ heneirã, hatishũ bestiki. ⁷Ha sete nai tsumabu hawẽ henea sëtímõ hawẽ trombeta txã akaya Deusũ tsumabu hawẽ hãtxa yuishunikabu haska inũbariaikiri Deus hune yubakapauni ma hatishũ besti meneshanikiki”, ikaya

⁸ha hui nai anua tashniai ẽ nĩkaxinatũ ana ea yuikĩ: “Ha nai tsuma hawẽ tae betsa iãnẽwã bepaia hawẽ tae uke betsa maiki paiatũ una pixta sebi bepemana tsumaki nukushũ mebĩwẽ”, ea wa ⁹kashũ yuikĩ: “Ha una pixta sebi bepemana mĩ tsumarã, ea inãwẽ”, ẽ aka ea yunukĩ: “Naki, piriwe. Mĩ pia mĩ hana buna bata keska ibiatã mĩ hatu mukahairaikiki”, ea wa

¹⁰ha una sebi pixta nai tsumã tsuma mebĩtã ẽ pia ẽ hana buna bata keska batabiakaini ẽ hatuki nanekĩ muka wabainaya ¹¹hanushũ nai tsumabũ ana ea yuikĩ: “Deusũ mia ana yunuirã, mia yuinũ nĩkawe. Mae betsa betsapa anu hiweabukiri inũ, nawa mai pakea betsa betsapakiri inũ, hãtxa tibi hãtxaibukiri inũ, shanẽ ibu kuxipahaira betsa betsapakiri hawẽ hãtxa bena shabakabi hatu keneshũkĩ haska Deusũ hatu haska washanai hatuki txaniriwe”, ea wa ẽ nĩkashuki.

11 ¹Hanushũ hawẽ mesteti tanati tawa meshte nai tsumã ea inãshũ yuikĩ: “Benikaini kashũ ha tanatiwẽ Deus kẽwãti Templo Jerusalém anu tanatã tapu hanu hawẽ inãkuĩti hanamisbu tanatãwẽ. Hanushũ hatibũ hanushũ habũ Deus kẽwãkubaĩmisburi númerowẽ yuraburi tanariawe. ²Hakia hawẽ kẽwãti Templo hemaĩtĩ Deusũ nawabu

ma hatu yunuima hanushū habū 42 ushe Deus danākī hawē mae pepa itxakawakubaishanaibu hemaīti anu tanayamawe. ³Hanushū ea Deusū ē tsuma dabe ē kuxipa inākī ē hatu yunua yurabuwē nuihairakī besha tari sawetā 1.260 shaba ē kakape yusī hātxakubaishākanikiki”, ea washu

⁴hatukiri matu yuinū nīkakāwē. Na Deusū hātxa yuishunika daberā, oliveira hi dabe inū bī pehaira dabe keskabū mai dasibi hatū damiwani Ibu Deusū yunua anū ikaiburā, hawē besuuri nia keskabuki. ⁵Habu dabe tsuabūra hatu danākī hatu txakabuwanū ikaibu ha habu haki sinataibu hatū hashpawē habuī shuū akī txi here tashnimakī hatu kuakī tenāshākanikiki. ⁶Ha inū, Deusū hawē kuxipa hatu yunua hawē hātxa yusīkubaīkī hau ana ui iyamayunū nai beputirubuki. Ha inū, habū hene dami wakī himi watirubuki. Ha inū, hawatiāra hatu dasibi tenemakatsis ikī hamapai isī inū hamapai betsa xarabu mai anu hiweabu hatu bika tenemakeaketirubuki, Deusū kuxipa hayabuwē taeshunā.

⁷Hakia Deusū hātxa kakape hatu yunua yusīkī keyuaibū hawara atimapa pubenepa mai kini keyatapahaira anua mapekekirā hatube atxinamekī hatu maemakī tenāyā ⁸Jerusalém bai kaya namaki habū yura datābu na haskairā, hanushū hatū Shanē Ibu cruzki mastanibu anu ha mae ewapa Jerusalém anu yura hiweabū Deusū hātxa danākī nīkaisuma Sodomā inū Egito anu hiwenibu keska ikubainaibu anu hatū yura dakakē ⁹shaba dabe inū besti namakis mae tibi anu hiweabu inū, yura betsa shukuabu tibi inū, hātxa betsa betsapawē yuiaibu inū, mai pakea betsa betsapa anuabū ha mawa daka hau maiwayamanubū hatu yunuabuma ¹⁰Deusū hātxa yuikī habū hatu ha akaibu ma mawabuwē taea mirimabu mai anu hiweabu benimai xinā txākaī hatū haibuaibube hatū hamapai hamē inānānaibū

¹¹hanua haskabiabū shaba dabe inū besti namakis kaya hawē hātxa yuishunikabu Deusū ana hatu bestēwā ana hiwei benirabeaunaibu dasibibū hatu uī date paepaibū ¹²hanua nai anua hui kuxipawē Deusū hātxa yuishunika dabe Deusū hatu kenakī: “Neri inari bekāwē”, hatu wa nīkatā nai kuīwē inaiibu ha haki sinataxinabū uīaibū ¹³ha haskabaini nesebainaibū patxa sakuaya ha mae décima parte pake betsa di akaya 7.000 yurabu debuaibū dasibi yura betsabu habu hiweyuabu datehairai damapaikī Deus nai hirabi shanē ibu kuxipahaira ikūwāmabia kēwaību haskashanaibu nīkakī ē uīshuki.

¹⁴Hanua ha segundo mesehaira atimapa keyukainaya hanua ana betsa terceiro tashniriama hawaira kaīriaikiki.

**Ha sete nai tsumabu hawē henea sétimo trombetayatū
hawē trombeta txā anikiaki, na hātxarā**

¹⁵Ha sete nai tsumabu hawē heneatū trombeta txā akai ē nīkaya nai anua hui kuxipawē habū kēwākī yuikī:

“Nukū Shanē Ibu Deus inū
hawē bake Messias Jesus Cristo besti
natiā mai hirabi anu ha besti shanē ibukī

hatu mekekubaishanikiki, niti ikamarã”,
 ikaibũ ¹⁶ha 24 mekenikabu Deus shanẽ ibũ haki tsauti dapi hanu
 tsauwabũ habũ Deus kẽwã hawẽ tae namã maiki dãti iki beti ishũ
¹⁷yuikĩ:

“Yavé Deusũ, mĩ pehairaki.
 Mai hayariama mĩ hiwenirã,
 natiã betsama habias mĩ hiweaki.
 Shanẽ ibu betsa yamawatã
 mĩ kuxipa mĩ hayakũkaĩmiswẽ yura dasibibu mekei
 mia besti mĩ ma shanẽ ibui taeai.
 Mia besti kuxipa dasibi binu keyua mĩ pepa nũ mia kẽwaiĩ.

¹⁸Ha dukũ mai hirabi anuabũ mia abuama
 mia danã paepawai miki sinatakubainimabuki.
 Hakia miari natiã hatuki sinatariai
 hanu hatu kupinũ ika mĩ ma tashniaki.
 Hanushũ mawabu bestẽwãtã hatu unãti wakĩ
 mĩ tsumabu mĩ hãtxa yuishunikabu inũ,
 minabu wakĩ meribi mĩ hatu wani
 habu dasibi shanẽ ibubu inũ shanẽ ibubumã
 mia txibãkĩ mia kẽwãkubaĩmisbu
 habũ pepawẽ mĩ hatu manakushanai.
 Hakia habũ hawara mai anushũ pepa yamawakĩ
 mia txibãkubainama mia danãmisbu
 habũ txakabuwẽ hatu unãti watã manakuriakĩ
 habũ txakabuwẽ miãri mĩ hatu yamawai kaii”,

akaibu ẽ nĩkaya

¹⁹hanushũ Templo nai anua bepẽshũ ha hiwe meranua Deusũ nukũ
 shenipabu yubani kene hi bauki arua hatu uĩmaya kana baka baka iki tĩ
 ikaĩkainaya patxa sakuaya barush ui ewapabu niri iki haskai keyushanai
 ẽ uĩshuki.

Aĩbuki yuxibu sheanã pubẽnikiki, na hãtxarã

12 ¹Hanua nai anua unãmati betsa tashnikirani aĩbu hawẽ batxi
 barĩ txashapã yabua inũ, hawẽ tae ushẽ tãtxasha inũ, shanẽ ibũ
 maiti 12 bixi nea maia ²ha aĩbu tuya bake kaĩnũ ika isihaira mei bis ikai
 ẽ uĩayã

³hanua hawẽ unãmati dami betsa nai anua tashnia yuxibu sheanã
 taxipa hawẽ yura kapetãwã yura keska sete bushkaya dez mashũyã
 bushka tibiki shanẽ ibũ maiti maia tashnitã ⁴tsuãra bixi hatiubukũs watã
 pake dabe inũ besti habiatius wakẽ pakea betsa yuxibu sheanãtũ hawẽ
 hina bekũ bekũ akĩ bixi pakea betsa mai anu urẽtã ha yuxibu sheanãtũ
 aĩbu tuya bake kaĩnũ ikai ha dapi hawẽ besuuri nishũ hawẽ bake kaĩã

atxishū shēanū, iwanā, manaya ⁵ha aību anua huni bake kaītā ewatā nawa betsa betsapa dasibi binukī habū Deus nīkabuma hawa kaneama kupi hau shanē ibushanū ha bakeixta kaīa sheanātū shēapanā iyukī hawē shanē ibū tsauti anu Deusū pashawakī ainikē ⁶aību hanu tsua hiweabumanu pashawakī mae betsa anu Deusū aību pewashuni anushū 1.260 shaba harishū hau pimakubaīshanūbū hari yunua aību pashakē

⁷hanua nai anua Deusū nai tsumabu shanē ibuhaira Miguel hawē tsumabube inū yuxibu sheanā hawē tsumabuyari hatube detenameaibū ⁸yuxibu sheanātū maematirubumawē taeshū nai anu ana habube hiwetirubuma Miguelī hatu urēkī ⁹ha yuxibu dunuwā hiwei taeni sheanā txani ewā yura dasibibu hatu parākubaīmis nū Diabo Satanás wamis hawē tsumabube mai anu hatu maemakī niri akabū

¹⁰hanua hui kuxipa nai anua kaīa ē nīkaya yuikī:

“Nukū betsabu habū ikūwaību
bariri inū mexu merā Deus bebūshū
nuku hatu txitēkī yuāmis ma putabuki.
Pehairaki. Natiā Deus shanē ibuaya
hawē bake Messias Jesus Cristo habe shanē ibukī
hatū kuxipahairawē nuku mekekī taewakanikiki,
ha yaxikī ana hawenabu benutimarā.

¹¹Habu nukū betsabū Satanás maemakinā,
Jesus Deusū txashuwā bake habu mawashūkī
hawē himi habaniwē taea inū
hawē kakape hātxa txanikī
hawa dateama hatū hiwea benutiruma unākubaīmisshū
habu mawawē dateisumā Satanás ma maemariabuki.

¹²Haskawē taea nai inū mā hanu hiweabuū, benimarikāwē.
Hakia mā mai anu inū iānēwā anu hiweabuū, mā peirakāwā.
Satanás pubēhairatū bari itxapama besti matu itxakawatiru
xinaī matu anu ma hari butuaki”,

hatu wa

¹³hanushū yuxibu sheanā ma mai anu puta uītā ha huni bakē ewa yuxibu sheanātū itxakawakī nuitapawakī taewakubainaya ¹⁴hanu tsua hiweabumanu txai harishū bari dabe inū besti namakis keska Deusū aību merabewakī pimakubainū, iwanā, tete ewapā pūyā damiwatā Deusū aībuki tсамiā hawē nuyakaini hanu hiweshanai anu pashawashanū ikaya ¹⁵yuxibu sheanā haki sinatahairakī hawē hashpakā ūpash taea txara txara ikī hene ewabaīkī hau aību nūtābainū, iwanā, aka ¹⁶hakia mā aību merabewakī ha yuxibu sheanātū hene wa ha mai hashpatā hene tsu akī keyuaya ¹⁷haskaya yuxibu sheanā aībuki ana sinatahairakī ana hawawē haska watima hawē bababu teshebū Deusū hātxa txibākī Jesus ikūwākubainaibu tenānū ika ¹⁸ha yuxibu sheanā iānēwā kesha hanus keshea nikē

**Jesus Cristo shanē ibuni mebinū ikai inū hawē
hāt{xashunika parananāshanaikirikikiaki, na hāt{xarā**

13 ¹hanua yuinaka ewapa mese atimapahaira iānēwanua mapekeai ē uīshu matu yuinū nīkakāwē. Hawē bushka sete haya inū, dez mashūyā inū ha tibiki shanē ibū maiti maiaki. Ha dikabi hawē bushkaki Deuski shetxakati hawē kenaya hayaki. ²Ha inū, hawē yura inu keneya keska inū, hawē tae inu betsa mexupa urso itamama tae keska inū, hawē hashpa inu leão pubēhaira keskaki. Haska inū, yuxibu sheanātū ha yuinaka mese atimapahaira hawē kuxipa pae inū, hanu shanē ibui haki tsaumis inū hawē yunuti kuxipahaira inākī yunua ³hawē bushka betsa tenānū, iwanā, tsuāra txatxikī debuwani keska ma buni baka haya mai anu yura dasibibū ha mese uī e iki dateyabi: “Habaa!” ikī uīkī txibaibū ⁴habiatīāri yuxibu sheanātū hawē kuxipa ha yuinaka mese atimapahaira ināwē taeshū dasibibū kēwākī ha dikabi yuinaka mese atimapa kēwākī yuikī: “Na yuinaka atimapa keska tsua hayamaki. Tsua habe detenamekī maematirumaki. Pehairaki”, ikaibū

⁵hanushū yuxibu sheanātū yuinaka mese ha kuxipa haska tibiwē hau kuxipanū yuikī: “Hamapai hāt{xa atimapai Deuskiri shetxakai 42 ushe kuxipakūkaiwē”, aka ⁶haska yunua akī Deuskiri hāt{xa txakabui hakiri hamapai betsa betsapa atimapa yui inū hawē kēwāti Templokiri inū nai anu hiweabu hawē hāt{xawē hatu itxakubainaya ⁷ha dikabi yuxibu sheanā hau Deus txibākī Jesus ikūwaibube detenamei hau hatu maemanū kuxipa inākī yunutā yura betsa shukuabu tibi inū, mae tibi hiwebaunabu inū, hāt{xa tibi yuiaibu inū, nawa mai pakea tibi anu hiweabu shanē ibukūkaiwē, ikī hāt{xa wakī menekē ⁸ha yuinaka mese atimapa kēwākinā, habu mai hirabi anu hiweabu tsuabura bebūkiri Deusū mai dami wariama habū kena txashuwā bake nuku mawashuni kaitū unaki keneama ini habū besti duawakī kēwāshākanikiki.

⁹Tsuabura mā pabīkiyabunā, nīkakāwē:

¹⁰“Tsuara bitxiti hiwe anu iyukatsi ikī

bitxiti hiwe anu hatu bitxishākanikiki.

Hanushū tsuara nupe txaipawē hatu tenākatsis ikī

nupewē hatu debuwashākanikiki”,

habū txanima Deus ikūwākī habū hawa xinā betsa wama hatū kuxipa hatu uīmashākanikiki, ikūwaī meribibunā.

**Yuinaka ewapa mese atimapahaira mai meranua
ha katxu kainikiaki, na hāt{xarā**

¹¹Hanua yuinaka ewapa mese atimapahaira betsa mai meranua tashnikirana ē uīshu matu yuinū nīkakāwē. Txashuwā bake mashū dabeya keska yuxibu sheanā dunuwā taeya Satanāskirā parananāi hāt{xai ¹²ha yuinaka mese atimapa betsarā, ha ha dukū tenānibubia ma hawē dete bunitū hawē kuxipa dasibi hayatū ha bebūshū mai hirabi anu hiweabu ha ha dukū yuinaka mese atimapa

hatu kēwāmakubaikī ¹³hanushū dami tsuā haska atiruma yurabū berubi kaīmākī naiuria txi here pakeaya ¹⁴hatu haska washū uīmākī ha yuinaka mese atimapa ha dukūtū besuuri hamapai atimaska akaiwē yurabu dasibi parākī ha katxukeatū yunukī yuikī: “Yuinaka mese atimapahaira ha tsuāra bushkaki txatxini mawa ana bestēni hiwea keska ha itsa damiwarikāwē”, hatu wa ¹⁵ma damiwabū yuinaka ha katxukeatū ha ha dukū yuinaka mese kuxipa inā ha damiwabu hiwemākī hātxamaya habū ha kēwābuma hau hatu tenānū ¹⁶hanushū dasibibu hatiri shanē ibubu inū shanē ibubuma inū, hatiri mabuwāyābu inū nuitapaibu inū, hatiri tsuāra tsumabu inū tsumaumabu yuinaka mese atimapa ha katxukeatū hawenabu unāti wakī betsabu habū mekē yusiuri tushkutimawē netākī betsabu habū betūkuki netākī wabu ¹⁷tsuabura ha yuinaka mese atimapā kena inū hawē unāti número hayabumanā, hawa habū hatū hamapai inātirubuma inū bitirubuma hatu wamashanikiki.

¹⁸Haskakē unānepahairatū nīka pehairawatā tanairā, eskatiki. Matu yuinū nīkakāwē. Yuinaka ewapa mese atimapa hawē número 666rā, huni betsā hawē kena unāmatī númeroki. Ha número unañā, bikahairabia unānepatū bestī tanatirubuki.

Nai anushū nawati benawē kēwai nawanibukiaki, na hātxarā

14 ¹Hanushū ana uīkī Deusū txashuwā bake Siāo mati anu ha yurabu 144.000 habe mapuabu hatibu hawē kena inū hawē Epa Deusū kena ha dabetū kena hatū betūkuki kene nea habe mapuabu ē uīshu matu yuinū nīkakāwē. ²Nai anua hui betsā kaiaī hene diri ikai hui keska inū, kana tī ikainaitū bana hui keska inū, yura itxapabū habū harpa mimawati mawaibu hui keskawē ha mapushū ³nawati bena nawaibu ē nīkashuki. Deus shanē ibu haki tsauti besuuri inū ha hiweabu dabe inū dabebū besuuri inū, ha ²⁴mekenikabū besuuri hawē nawati benawē ha 144.000 habu ha yurabu anua katukī Deusū hawenabu hatu wani nawaibu uīkī ē nīkashurā, habū bestī ha nawati bena unākanikiki, tsua betsā ha tapītirubumarā. ⁴Ha nawakī Deus inū hawē bake txashuwā bestī duawakī kēwākubainūbū Deusū habu ha dukū inākuī keska wakī habu dukū katuniki. Haska Deus inākuūmisbu keska wakī habū hatū yura Deus inū hawē bake inābu hatu mekenibu habū aibu betsabu txutabaunabuma pepa bestī Deusū txashuwā bake hanira kai anu habu hatxū bushākanikiki. ⁵Haburā, habu anua tsuā txani betxitirubuma inū hawa txakabu hatukiri yuitirubumaki.

Nai tsumabu inū nukū Hutxi Kayabi Iuwatū yurabu kupishākanikiaki, na hātxarā

⁶Hanua ana betsā tashniai ē uīyā nai tsuma betsā nai natukanu nayakaūkī Deusū hātxa kakape bunikatū mai anu hiwebaunabu nawā mai pakea tibi anu inū, yurabu shukuabu tibi anu inū, hātxa tibiyabu anu inū, mae tibi anu hiwebaunabu hātxa ikibi ika hatu yuinū ika ⁷hui kuxipawē yuikī: “Deusū nai inū mai inū iānēwā inū ūpash txatxa tibi

damiwanitū yura dasibi unāti watā na habiatīā hatu kupikī taewaikiki. Haskakē menā haki dāti itā Deuski datekī kēwārikāwē”, ikainaya

⁸hanua ha nai tsuma betsa ha katxukeatū txibābaikī hui kuxipawēri yuikī: “Babilônia maewā kē ewa ma yamaikiki. Babilônia anuabū txakabuhairawakī txutawē kemukubaikī nawa betsa betsapabu dasibi habiaskari txakabu atimapa hatu wamakubainaibuwē taeshū habū mae ewapa Babilônia Deusū kupikī ma yamawaki”, ikainaya

⁹hanua nai tsuma betsā txibāriabaikī hui kuxipawēri yuikī: “Tsuabūra yuinaka mese atimapa inū hawē dami kēwānū ika habu heē iyamama hatū betūkiki inū hatū mekēki hawē unāti mā hatu netāmamisburā, ¹⁰Deus ma hawē sinata pae hatuki tanani hawē hatu kupihairakī enxofre paxinipawē hatu nuitapawakī tsekerē imakī txiwē menukī hatu kupihairashanikiki, Deusū nai tsumabu inū txashuwā bake bebūshunā. ¹¹Ha inū, tsuabūra yuinaka mese atimapa kēwākī hawē dami kēwāriaibu hawenabu wakī hawē hatu unāti wai hatu nemama hatū kena hatu netāmamisbu bariri inū mexu merā heneama ha kuīwē txi nukaismawē dunua nuyai bari tibi hawa huīrukuāma isī tenetxakayamakubaishākanikiki”, ikainaya

¹²hanushū habū txanima Jesus ikūwākī habū hawa xinā betsawama Deusū hātxawē hiwekī hatū kuxipa hatu uīmashākanikiki, ikūwaī meribibunā.

¹³Hanushū nai anushū hui betsa tashnikī ea yunukī: “Na hātxa keneriwe. Na habia unuri pakea nukū Shanē Ibuki dasitā mawakubaishanaiburā, Deusū hatu benimahairawashanikiki”, ikaya hanushū Yushī Papatūri ea yuikī:

“Habiaskaki. Haburā, hatū daya henetā huīrukū bestishākanikiki. Ha inū, hamapai xarabu Jesus Cristo ashūkubaīmisbuwē Deusū hatu manaku bestishanikiki”, ea wai nīkakī haskashanaibu ē uīshuki.

¹⁴Hanu ana betsa kaīāi uīkī nukū Hutxi Kayabi Iuwa nai hushupa kuburuki tsauwa shanē ibū ouro maiti maia inū hawē mekēwē beki matxatu txaiapa ewapa kenuhaira tsuma ē uīshuki. ¹⁵Templo nai anua nai tsuma betsa kaīkirākī ha nai kuburuki tsauwa yunukī hui kuxipawēri yuikī: “Yurabu mai anu hiweabu yunu banaimabu keskarā, ma hanu kania tsekati keskaki. Hanū mī beki matxatu txaiapa mī tsumawē shekiwā meshtea keska wakī itxawashū aruriwe”, aka ¹⁶hanushū ha nai kuburuki tsauwatū hawē beki matxatu txaiapa bekūki Deusunabu mai anuabu meshtea keska wakī hatu itxawashuki, mekekinā.

¹⁷Hanua nai tsuma betsa Templo nai anua beki matxatu txaiapa kenuhaira tsuma kaīriakiranaya ¹⁸hanua nai tsuma betsā txi dasibi yununika Deus kēwākī tapu hanu hawē inākuīti hanamisbu anua kaīkirākī nai tsumā beki matxatu txaiapa tsuma hui kuxipawē yunukī: “Yurabu txakabu uva bimi ma huxiā keskaki. Kania tibi meshteshū itxawariwe”,

akaya ¹⁹hanua Deusū nai tsumã hawẽ beki matxatu txaipa tsumashũ yurabu uva bimi kania keska tibi meshteshũ hawẽ bimi hene biti tsiniti anu mãtxĩshuki, hau habuki sinatakĩ tsinikĩ akawakĩ hatũ txakabuwẽ kupinunã. ²⁰Hanushũ mae benãta uva bimiki paikĩ hawẽ hene bimisbu keska wakĩ Deusū habũ himi habamakĩ bai mata keska wakĩ cavalo hawẽ kui anu kesũbaĩkĩ 300 quilômetro habamabaĩshanai ẽ uĩshuki.

**Yurabu hatu itxakawati sete nai tsumabu
haya Joãonẽ uĩnikiaki, na hãtxarã**

15 ¹Hanushũ hawẽ hatu unãmakĩ itxakawati mese sete hawẽ henea haska nai anua kaĩai ha uĩ e iti txakabuhairawẽ haska nai tsumabũ Deusū yurabu nuitapawakĩ hatu itxakawashanai sete nai tsumabũ kãtxa tibiki hawẽ henea Deus sinatamis tsumabu ẽ uĩayã

²hanua ha dukũ iãnẽwã beshnãhaira bixtu keska txiyabi husia hayaki. Haskarã, eskaki. Habũ ha yuinaka mese atimapahaira inũ, hawẽ dami danãkĩ kãwãbuma inũ, hawenabu hawẽ unãti número kena danãkĩ Deusū hãtxa txibãkĩ Jesus ikũwãkubaĩkĩ maemaxinabu habu iãnẽwã dapi mapushũ Deusū mimawati harpa hatu inã tsumabu ẽ uĩshuki.

³Habu nawakĩ Deusū tsuma Moisés inũ Jesus txashuwã bake ha dabetã nawatiwẽ Deus kãwãkĩ nawakĩ yuikĩ:

“Dasibi hamapai dami ewapa tibi akĩ mĩ hatu e imati anirã, mĩ mia bestiki,

Yavé Deus kuxipa dasibi binu keyuarã, mai hirabi yurabũ mĩ Shanẽ Iburã.

Tsua parãma mĩ xinã kayatapiawẽ txanima mĩ nuku pe mekekubaĩmiski.

⁴Mia besti meribi hiwea mĩ kaneisma unãkĩ

yurabu betsa betsapa dasibibũ mia yui mesewai datebetanã duawakĩ mia kãwãshãkanikiki,

mĩ pepawẽ kaneama mĩ akubaĩmiswẽ taeshunã”,

akaibũ

⁵haskaibu naiuri ẽ uĩayã Deusū hiwe nai anu bepẽmanakainaya Deus yubakatã Moisés hiwe wamani ⁶ha meranua sete nai tsumabũ ha tibitũ hawẽ hatu itxakawati tsuma kaĩbiranaibũ habũ tarirã, hushupa txashahaira sawea inũ ouro naneshketi shutxi putxinĩ kesua sawea mapuabu ⁷ha hiweabu dabe inũ dabe betsã ha sete nai tsumabu tibi ouro kãtxaki Deus hiwei ikibi ini hiweatũ hawẽ yurabu kupiti mata hatu inãkeakeaya ⁸Deus kuxipa duapahaira txi kuĩ keska hawẽ meribi dũtu mata anua huikiki. Ha sete nai tsumabu habu tibitũ itxakawatiwẽ yurabu itxakawakĩ keyuriabumakẽ Deusū Templo anu yane hikitorubumaki.

16 ¹Hanushũ ẽ ana nĩkaya nai anu Deus kãwãti Templo anua hui kuxipawẽ sete nai tsumabu tsuãra yunukĩ hatu yuikĩ: “Matũ sete

kētxaki Deus sinatamis mata mesehaira mai anu bushū hiweabuki hatu hukakeakeritākāwē”, hatu wa

**Deusū hawē hatu kupiti sete nai tsumabū kētxa mata
hukakeakekubainaibu uīnikiaki, na hātcharā**

²nai tsuma betsa ha dukū kashū hawē kētxaki Deus sinatamis mata mai anu hukaya ha yurabu mai anu hiweabu habu ha yuinaka mese atimapa habū unātiyabu inū hawē dami kēwāmisbu habū yuraki txami isī atimapa kaikī isīhaira hatu tenemaya

³hanua nai tsuma ha segundo kashū hawē kētxaki Deus sinatamis mata iānēwanu hukaya huni pubē hatuki sinatakī hatu txatxia mawai himi habamis keskai hene pisiwa hene merā hiweabu dasibi mawaibū

⁴hanua nai tsuma ha terceiro kashū hawē kētxaki Deus sinatamis mata hene kayabi dasibi inū txatxa dasibi anu hukaya hene dami himi keyuaya

⁵nai tsuma hene hatū mekemistū Deus yuikī:

“Mai hayariama mī hiweni inū
natiāri Deus meribi hiwemistū hawa kaneama
habis hatu unāti wakī mī amisrā, mī mia besti nū unaiī.

⁶Mī hātcha yuishunikabu inū
Jesus txibaibu itxakawakī
habū himi habawakī tenākubaāmisbu
haburi hatu kupikī himi mī hatu amaii.

Haska mēnū ika imisburā, hau haskanūbūwē”, akaya

⁷hanushū Deus kēwākī tapu hanu hawē inākuīti hanamisbu anushū tsuāra yuikī: “Shanē Ibu Epa Deus dasibi binuatuū, hanuki. Dasibi kuxipayakī kaneisma yurabu unāti watā txanima mī xinā kayatapiawē miā besti mī hatu kupiaii. Mī pehairaki”, akaya

⁸hanua nai tsuma ha quarto kashū hawē kētxaki Deus sinatamis mata bari anu hukakī bari kuxipa wa ha barī kuxipa bitā yurabu menuaya

⁹hawē kupiti txakabu tibi Deusū yunukī hatu tenemaiwē taeshū ha kuhairaiwē menubiakī haska xarabu mebiai Deuski shetxakakī kēwānū ishū xinā betsa wabumaki.

¹⁰Hanua nai tsuma ha quinto kashū hawē kētxaki Deus sinatamis mata yuinaka mese atimapahaira haki tsauti anu huka hawē mae mexuaya yurabu ana hawawē haskatima isī tenei hatū hana bushtebaibaina manibia ¹¹habū isī txakabu tibi mebiai inū txami tenebiai habū hiwea txakabu henekatsi ikama Deus nai anu hiwea haki shetxakai hātcha txakabu yui heneabumaki.

¹²Hanua nai tsuma ha sexto kashū hawē kētxaki Deus sinatamis mata henewā Eufrates anu hukaya hau shanē ibubu bari huaikiria hau hawē benūbū bai tapīshuni hene netsuaya

¹³hanushū yuinaka mese atimapa hashpa anua inū, yuxibu sheanā hashpa anua inū, huni betsā parā hātcha yusīmis hashpa anua habu tibi

anua yushĩ txakabu heu keska kaĩaĩ ã uĩshuki. ¹⁴Ha yushĩ tibirã, hawẽ yushĩ txakabuwẽ dayakĩ dami atimaska betsa betsapa hatu washũkĩ shanẽ ibubu dasibi mai hirabi anua hatu tashnibirã hatũ soldadobuya detenamemanũ, iwanã, hatu itxa wakẽ hanushũ Deus kuxipa binuatũ hanu akaitiã hatu maemakĩ yamawashanikiki.

¹⁵Haskai ã uĩayã Jesus hãtxai: “Uĩa. Ea ana matu anu kairã, ã yumetsu kai keskakaĩshanaii, tsuã haska ana xinãmakenã. Habu mã benimashanaiburã, usha keskama bestẽshũ mã hiwea mã tari mã meke pewa keska ishãkãwẽ, hawa mã tari pekatã nia keskamarã, matũ yura tariuma nia hawẽ mã daketiru keska iyamakãshunã”, ea waya

¹⁶hanushũ yushĩ txakabu heu keskabu bushũ hau Deusbe detenamenũbũ hawẽ Hebreu hãtxawẽ Armagedom mae anu shanẽ ibubu dasibi hatu itxawabu

¹⁷hanua ha nai tsumabu hawẽ henea ha sétimo kashũ hawẽ kãtxaki Deus sinatamis mata hawẽ huĩsinaibu anu niwe anu hukaya hanua Deus shanẽ ibu haki tsauti hawẽ hiwe anua hãtxa kuxipa kaĩkĩ yuikĩ: “Ma hatis besti ã keyushuki”, ikaya

¹⁸hanua kana baka baka itã tĩ ikaĩkaini mai taka aki mai patxa sakui yurabu mai anu hiweabu: “Haskakũkiranai nũ meismakĩ”, iki mesehairaibũ ¹⁹dasibi yurabũ mae ewapa Deusũ tekekĩ keyukĩ ha mae ewapa Babilõnia kuxipahairabia hawẽ txakabu xinaĩ haki sinatahairakĩ pakea dabe inũ besti washũ hatu kupihairakĩ ²⁰dasibi natukã tibi yamawariakĩ mati dasibi yamawakĩ ²¹haska waya naiuria barush ui itamama betsa 40 kilo yurabuki niri imaya barush ui mesehairawẽ taea yurabu Deuski shetxakashanaibu nĩkakĩ ã uĩshuki.

Mae ewapa betsa aĩbu hininipa keska Deusũ kupishanikiaki, na hãtxarã

17 ¹Hanushũ ha sete nai tsumabu betsã sete kãtxaki Deus sinatamis mata tsuma hushũ ea yuikĩ: “Neri huwe, aĩbu hininipa henewã nemaki tsauwa ã kupiai ã mia uĩmairã. ²Mai hirabi anu shanẽ ibubu hawẽ kemui habe txutanamei keskai ma habe beyabuki. Haska inũ, yuraburi mai hirabi anuaburi Deus kayabi ikũwãma hamẽ yushĩ betsa betsapa ikũwaĩ hawẽ kemui txutai keskai habũ kemu paewẽ hawẽ paẽa keskabuki. Uĩwẽ”, iwanã,

³hanua ha nai tsuma ha ã yushĩki nukushũ nama keskawẽ ea uĩmaitũ hanu tsua hiweabuma anu ea iyua harishũ uĩkĩ aĩbu betsa yuinaka mese atimaphaira taxipaki katsaumea ã uĩshuki. Ha yuinakarã, sete bushkaya inũ dez mashũyã inũ Deuski shetxakati kena haki yabukuaki. ⁴Ha inũ, ha aĩburã, tari taxipa ushna duakabi inũ taxipahaira sawea inũ, hawẽ hawẽruai daukĩ ouro mane inũ, nãkati mane hawẽrua karuhaira sawea inũ, txuri mane pérola hushupa karuhairari saweatũ hamapai

pepa danaĩ hawẽ atimapamis kētxaki tsuma haya ⁵inũ, hawẽ betũkuki hawẽ hunea kena kenea: “Babilõnia mae ewapa mesehaira ea ã hatũ ibu hininipaki. Ea anu aĩbu hininipa dasibi inũ hamapai xarabu mai hirabi anushũ pepa danãkĩ txakabuwasibũ hiweabuki”, ika netãki. ⁶Haska inũ, Jesus txibãkĩ hawẽ hãtxa yusĩmisbu mirimabu ha aĩbu hininipa itsa mae ewapa Babilõnia anuabũ hatu tenãshũ habũ himi akai keska paẽa haskai uĩkĩ xinaĩ e iki teku itã ã pes nikẽ ⁷nai tsumã ea yuikĩ: “Haskai e iki mĩ hawẽ dateai? Ha aĩbu inũ ha yuinaka atimapa mese sete bushkaya inũ dez mashũyã aĩbu haki tsauwa ha dabekiri hunea shabakabi mia yuinũ nĩkawe. ⁸Yuinaka mese atimaphaira mĩ uĩshurã, bebũkiri hiwebiani natiã ana hiwea hayamabia haskabia ana hawẽ henei Deus kupimakĩ keyumayui kini keyatapa shãkĩhaira anua mapekei tashnia Deusũ yamawashanikiki. Haskakiranai mai damiwaitiã tsuabura Deusbe hiwekuĩshanaĩbu unaki Deusũ habũ kena netãma ini yuinaka mese atimaphaira mawabiani ana ũ unuatiã hiwea mapekea habũ uĩkĩ yui: ‘Habaa! Hawamẽ?’ ishãkanikiki.

⁹Ha yuinaka mese atimaphairakiri unãnepa bestibũ xinãkĩ unãtirubuki. Hawẽ sete bushka unãtirã, sete mati Roma anuki, haki aĩbu tsauwa unãtirã. Ha dikabi hawẽ sete bushkarã, sete shanẽ ibu hawẽ unãtiriki. ¹⁰Ha inũ, cinco shanẽ ibu ma mawanibuki. Hakia betsa natiã shanẽ ibuikiki. Ha inũ, betsa shanẽ ibunũ ika huriamaki. Hanua ha hawẽ henea shanẽ ibui huarã, hatishuĩra bari itxapa shanẽ ibuama ishanikiki. ¹¹Ha inũ, ha yuinaka mese atimaphaira ha shanẽ ibu sete betsa ibiani ha dukũ hiwebiani natiã ana hayamabia ana hiwea ha oitavo shanẽ ibu ishanikiki. Hakia atimas ha yuinaka mese atimaphaira hawẽ henekĩ Deusũ kupikĩ yamawashanikiki, niti akamarã.

¹²Ha inũ, ha dez mashũ mĩ uĩshurã, dez shanẽ ibubu betsaki. Habu shanẽ ibui taeriumabiakẽ yuinaka mese atimapa shanẽ ibukĩ hawẽ kuxipa hatu yunutã usha eskarabes ha dez habe shanẽ ibumashanikiki. ¹³Ha inũ, ha dez shanẽ ibunã, habe shanẽ ibukĩ yuinaka mese atimapã habias hawẽ xinã ashũkĩ merabewakĩ hawẽ yunuti txibãkĩ ¹⁴txashuwã bakebe deteneshãkanikiki. Hakia txashuwã bake Jesus Cristo dasibi shanẽ ibubu inũ dasibi yununikabu binukĩ keyumiswẽ taeshũ habu Deusũ katushũ hatu kenani txĩtuĩsbumabetã ha dez shanẽ ibubu maemashãkanikiki, nukũ Shanẽ Ibu Jesus Cristobetanã”, ea watã

¹⁵ha dikabi nai tsumã ana betsa ea yuikĩ: “Ha heneiwã namaki aĩbu hininipa tsauwa mĩ uĩshurã, ha mae tibi anu hiwebaunabu inũ, yura tibibu inũ, hãtxa betsa betsapa yuiaibu inũ, mai pakea itxapaki. ¹⁶Ha inũ, ha dez mashũ shanẽ ibubu inũ ha yuinaka mese atimaphairatũ ha aĩbu hininipa itxakawakĩ hawẽ kuxipa danãkĩ hamapai hawẽrua haya yamawakĩ ana hawẽ nuĩama henekĩ nuitapawakĩ hawẽ nami pikĩ keyutã hawẽ shau kuashãkanikiki. ¹⁷Ha inũ, ha dez shanẽ ibubunã, ha yuinaka

mese merabewakī habū kuxipa inākī habū hawē yunua txibākatsis ikī haska Deusū hatu haska wamakatsis ikai hatū huīti merã hatu xinãmaya haska yubakani menemakī Deusū hatu amakubaishanikiki. ¹⁸Ha inū, ha aību hininipa mī uīshurã, ha mae ewapaki, shanē ibu kuxipa tibi yunumisrã”, ea washuki.

Deusū Babilônia mae ewapa yamawashanai uīnikiaki, na hãtxarã

18 ¹Ea haska watanaya nai tsuma betsa nai anua butukirãkī kuxipahaira haya hawē txashawē mai txashawakī ²hãtxa kuxipawē sai ikī yuikī:

“Babilônia mae ewapa kē ewa ana hawama hawē kuxipa ma beshtekeaki.
Hanu Satanásã tsumabu inū,
hatū yushī txakabubu inū,
peiyabū pisi pimisbu inū,
yuinaka atimapa piama nū danãmis ma habu hawē hiwekanikiki.

³Ha inū, mai pakea tibi anua bea hawē hamapai tibi kemu pae hawēruawē kemui habe txutanamei keskaibu inū, shanē ibu kuxipa betsa betsapa tibiri txai hiwea mirimabū Babilôniaabe atiai keskai habe yubakamisbuki. Ha inū, ha mabu inānanãmisbu mai hirabi anuari bea hanua mabuwāyaī habū mabu inākī pei mirima bimisbuki”,

ikaya

⁴hanua hui betsa nai anua tashnikī yuikī:

“Enabuū, ha mae ewapa anua tashniribaikāwē,
hau habū txakabu akaibube mā husiama inū
hau Deusū atimapawē hatu kupikī
matu dikabis hau matu kupiyamashanunã”, iwanã,

⁵“Habū txakaburã, hamapai itxawakī maspuwakubaikī nai anu mati aka keska waibu

huneama ma shabakabi Deusū hatū txakabu betsa betsapa uīkiki.

⁶⁻⁷Haskawē taeshū Babilônia aību keskakī
ibubis dauī hamapai mabu pepa xarabu bi kēkī yuikī:

“Tsuabura ebe detenamekī ea maematirumaki.

Ha inū, hawē dabanã ē kashama ishanaii.

Hakia dasibi pepa xarabu haya shanē ibu aību keska ē hiweaki’, imiswē taeshū hawē txakabuwē inū hatu txakabuwamiswē taeshū dabeki kupikī ha mae ewapa aību keska habias keska wakī kupitxakayamakāwē, nuitapawakinã.

Babilônia mae ewapa anuabū yura betsabu kemumakī
kēwāmamiswē taeshū

itxakawakī habiaskari wakī hatu nuitapawatzakayamariakāwē,
hau ana betsa betsapa bikahaira tenenūbunā.

‘Hakia dasibi pepa xarabu haya shanē ibu aību keska ē hiweaki’,
imiswē taeshū hawē txakabuwē inū hatu txakabuwamiswē taeshū
dabeki kupikī ha mae ewapa aību keska habias keska wakī
kupitxakayamakāwē, nuitapawakinā.

⁸ Habū txakabuwakubaīmisbuwē taeshū
nukū Shanē Ibu Deus kuxipahairatū ha maewā aību hininipa keska
kupikī

habias shabatiā yura itxapa tenākī
betsabu bika tenemakī inū

buni tenemakī mae ewapa kuashanikiki. Manayukāwē”, iwanā,

⁹ ana nai tsumā ea yuikī: “Mae ewapa kuaya txi kuī nuyabainai shanē ibu
betsa betsapabu hawē hamapaiwē kemui habe txutanamei itsai kemui habe
hawē hawēruamisbu txakabu hatubetā akubaīmisbū uī hawē nui saī iki
kashatzakayamakī ¹⁰ ha keska tenekatsis ikama datei txai mapubaūshū yuikī:

‘Yuu, yuu. Babilōnia mī mae ewapa kuxipabiakē
hawaira Deusū kupikī mia yamawashuki.’

¹¹⁻¹³ Ouro mane inū, prata mane inū, nēkati hawērua karuhaira inū,
txuri mane hushupa bemisbu ana tsuā biama ishākanikiki. Ha inū,
tima tari pepahaira inū, txasha tari betsa ushna duakabi betsa taxipa
bemisbu inū, hi ininipa mabu inū, elefante makushpi txaipahaira hawē
mabu inū, hi pepa mabu karu betsa betsapa bemisbu inū, bronze mane
inū, ferro mane inū, epa hushupa pehaira mabu bemisbu ana tsuā biama
ishākanikiki. Ha inū, betsabū canela hawē piti nis pehairawati inū, piti nis
wati betsa betsapa inū, inīti betsa betsapa bemisbu inū, uva vinho inū, piti
sheni pepa inū, shekiwā duru pepa bemisbu ana tsuā biama ishākanikiki.
Ha inū, ina awa inū, txashuwā inū, cavalo inū, hawē tarābaīti inū, yura
betsa hau tsuāra tsuma wanū bibirā hatu ināmisbu ana tsuā biama
ishākanikiki. Haskakē inānanāmisbu mai hirabi anu Babilōnia mae
ewapawē taea kashatzakayamai hawē taea saī ishākanikiki, ana hanishū
hatū mabu hari bushū inātimawē taearā, akī yuishākanikiki”, iwanā,

¹⁴ habū mae ewapa ana yuikī:

“Babilōnia anuabuū, hamapai bimi xarabu mā hawē kemuhairamis inū
mā abumis mā ana hayamaki.

Dasibi hawē mabu hawērua tibi inū
mabu karu tibi ma benui keyuaki.”

¹⁵ Hanua hamapai pepa xarabu inānanākī pei itxapa bikubaīxinabu
ha mae ewapa anuma nāta mapua ana inānanātirubuma uī inū hatu
kupiaiwē taea hatuwē datei nui kashai saī ikī ¹⁶ yuikī:

“Aitaa. Aitiĩ. Mae ewapa kuxipa ha aĩbu hawērua keska
hanu hiweabũ tima tari pepahaira sawekĩ
tari ushna duakabi inũ taxipa sawekĩ
hawē dauí ouro mane inũ, txuri mane hushupa inũ,
nēkati pepa mane karuhaira sawebiabu

17 hatũ mabuwã hawaira haskashumẽ?”

ikaibũ

habũ shashuwã yunumisbu inũ, habũ shashuwã tuēbaĩkĩ bushkẽ
bushkẽ abaĩmisbu inũ, shashuwãwẽ bumisbu inũ, iãnẽwã anu dayamisbu
nãta mapubaũshũ 18 mae ewapa kuaya txi kuĩ nuyabainai uĩ sai sai ikĩ
yuikĩ: “Aitaa. Aitiĩ. Mae ewapa betsa ana haska keska hayanakamaki”,
iwanã, 19 hatũ beya txibaĩ mai mixpu kuru maputukui kashai saĩ ikĩ bis
ikĩ yuikĩ:

“Aitaa. Aitiĩ. Dasibi shashuwãyãbu Babilõnia anu kashũ
hatũ mabu pepa hawērua inãnanãtã
pei mirima bibirã bibiranaibu ha mae ewapa ma hawaira
yamashuki”, akĩ yuishãkanikiki, ea waya

20 haskaya hui betsa kaĩ txani:

“Nai anuabu inũ, mã Deusunabu meribibu inũ,
mã hawē hãtxa yuishunikabu inũ,
mã Jesusũ kuxipayaburã,
Deusũ na mae ewapa txakabuhaira kupikĩ
matuwẽ dabanã shũska sinatakĩ ashanaiwẽ taea maturã,
benimai xinã txãkãkubaishãkãwẽ”, ikai nĩkatã ã matu keneshunaii.

21 Hanushũ nai tsuma betsa kuxipahairatũ hawē deneti mixkipawã
binibaĩkĩ iãnẽwã anu urẽkĩ pukushũ yuikĩ:

“Na mixkipawã iãnẽwanu ã pukushu keska
ha mae ewapa Babilõnia tsuã ana uĩtiruma ipakeshanikiki.

22 Ana benimakĩ harpa mimawati mawaibu inũ,
teperewe xarabu mawaibu inũ,
trombeta mimawati mawaibu inũ,
mimawati betsa betsapa mawaibu matũ mae ewapa anushũ
ana hawa mimawabuma ishãkanikiki.
Ha inũ, hamapai mabu betsa betsapa wamisbu
matũ mae ewapa anu ana haska tibi daya hayama iriashãkanikiki.
Ha inũ, piti pepawai mixki denetiwẽ dayaibu
hawē hui dẽke ikai tsuã ana nĩkabuma iriashãkanikiki.

23 Ha inũ, hunĩ aĩbu aĩwãkĩ
hawē haibuaibu beyusmaya benimai txixixtapamisbu
tsuã ana nĩkama iriashãkanikiki.
Ha inũ, matũ mabu inãnãnãnika kuxipabũ

mai hirabi anu hatu pashkashūmis inū
 habianushūri mai pakea tibi anua beaibu
 mukayakī hatu parāmisbuwē taea
 matū mae ewapa anu tsua ana hayamakē
 ana tsuā bī txashawakī dekuabuma iriashākanikiki”,
 hatu haska washanai uīmakī ana ea yuikī:

²⁴“Ha mae Babilônia anushū Deusū hātxa yuishunikabu inū ikūwaību
 betsabū Jesus txibaību inū yura betsabu hatu tenākī habū himi
 haba wamisbuwē taeshū na mae ewapa haki sinatakī Deusū kupikī
 yamawashanikiki”, ea wa

19 ¹hanushū ē nīkaya nai anua tsuara mirimabū yuikī:
 “Aleluya! Nukū mekenika Deus nū kēwaii.

Duapa kuxipahairatū nū hawenabu nuku mekepakeshanikiki.

² Ha inū, yura dasibibu unāshū kaneama kupimiswē taeshū
 mae ewapa aību hininipa keskatū yurabu dasibi
 txakabuwamakubainai ma kupikiki.

Ha inū, aību hininipa keskatū Deusū tsumabu tenākubaīmiswē
 taeshū

Deusū hawē mae ewapa haki sinata paepakī yamawaikiki”, itā

³ hanushū habū ana yuikī:

“Aleluya! Deus pepahairaki.

Ha mae ewapa kuī inai hushu puepakeshanikiki”,

ikaibū

⁴haskaibū ha 24 mekenikabu inū ha hiweabu dabe inū dabetū Deus
 haki tsautiki tsauwa namā dāti iki maiki beti ishū kēwākī yuikī: “Hau
 haskanūwē. Aleluya! Txanima Epa Deus pepahairaki”, ikaibū ⁵ē nīkaya
 ha Deus tsauwa namanua hui betsa tashniriakī yuikī:

“Mā Deusū tsumabuū, mai hirabi anua betsabu
 mā shanē ibubu inū betsabu mā shanē ibubumā

Deusū kuxipaki mesekī duawai pepakī kēwākubaīkāwē”,

ikaibu uīkī nīkatā ē matu keneshunai.

Deusū txashuwā bakebetā ikūwaībū habetā pishākanikiaki, na hātstarā

⁶Hanushū ē nīkaya yura mirimabu hātchai hene diri ikai keskawē inū tī
 ikaīkainai keskawē yuikī:

“Aleluya! Nukū Epa Deus kuxipahaira dasibi binu keyua
 ha bestitū nuku dasibi mekei ma shanē ibui taeikiki.
 Pehairaki. Kēwanākāwē.

⁷Aību hawē bene huaiibe hiwenū, iwanā,
 hawē hamapai pewakī akawai
 Jesusunabu habe hiwekatsis ikanikiki.
 Ha haskarā, Jesus Cristo txashuwā bakē

hawenabu niti akama habe hiwemashanikiki.

Haskakē benimai xinā txākaī tse ikī

Deus kēwanākāwē.

⁸ Tima tari hushupa txashakapa pehaira

ha Deusunabu meribi habū hatū xināwē kaneama txibā pewamisbū

hau sawenūbū, iwanā,

hatū hiwea meribi unāmati ha tari ma hatu inā saweabuki”,

ikaibu ē nīkashuki.

⁹ Hanushū nai tsumā ana ea yuikī: “Deusū hātxa kayabi ē mia yuiyai nīkatā keneriwe, eskarā. Txashuwā bakē hawenabu nai anu habe hiwemanū, iwanā, hatu itxawashū habetā pirā, benimatxakayamashākanikiki”, ea haska yuiyai

¹⁰ kēwānū ika hawē tae namā ē dāti itanaya ea nemakī yuikī: “Eki haskayamawe. Mia inū Deusunabu betsabū Jesus Cristo txibākī hawē hātxa yusīmisbu keska eāri Deusū hātxa bunika ē hawē tsumariki. Haskakē ea kēwāma Deus besti kēwāwē”, ea washuki.

Haskarā, tsuabura Jesuskiri kakape Yushī Papatū shabakabi hatu xināmaya habu yusinābu hakiri txanikī banabimabaūmisbuki.

Cavalo hushupaki katsaūtā txakabubu kupi kanikiaki, na hātstarā

¹¹ Hanua nai bepemanaya shanē ibu hawē kena Txanima Hātxa Kaneisma cavalo hushupaki katsauwa ē uīshu matu yuinū nīkakāwē. Shanē Ibu pepatū yurabu unāti wai hatube detenamēnū ika ikairā, ¹² hawē beru txasharā, txi here keskaki. Ha inū, shanē ibu kuxipahairaiwē taea Shanē Ibū maiti itxapa maia hayaki. Ha inū, hawē hunea kena ha bestitū unāi ha kena haska haki neaki. ¹³ Ha inū, hawē tari sawearā, himiki pukua saweaki. Ha inū, hawē kena betsarā, Deusū Hātxa Kayabiki. ¹⁴ Ha inū, hawē soldadobu nai anua tima tari hushupa pehaira hawa detsisma saweari cavalo hushupabuki katsaumea hatxū kaībaīkī hatū Shanē Ibu txibābaīkanikiki. ¹⁵ Ha Shanē Ibu kairā, shanē ibu yununika mane kuxatia inū hawē hashpa anu nupe txaipa kenuhaira kaīa tukūwā hawē habū Deus nīkaisbuma mai hirabi anuabube hatube detenamei kairā, haskawē taea ha Shanē Ibu kayabistū hamebi ha hatuki Deus sinatai hatu uīmakī haska uva vinho tsinikī pema pema amisbu keska wakī Deus kuxipa binu keyuatū hawē pubē pae hatu memai kaikiki. ¹⁶ Ha inū, hawē kena mestenepa Dasibi Shanē Ibubu Inū Dasibi Yununikabu Binukī keyuaki, ika hawē tari txaipaki inū hawē kixi kateki ha dabeki hawē kena neaki.

Jesuksi habu haki sinataibu hatu maemanikiaki, na hātstarā

¹⁷ Hanushū ē uīayā nai tsuma betsa bari merā nishū dasibi habu peiyabū pisi pimisbu nai natukanu nuyabaūmisbu hatu kenakī hui kuxipawē yuikī:

“Nenu bei neri itxai bekāwē, hau Deusū matu pimanūnā. ¹⁸Habube Shanē Ibu detenamekī maema habū namirā, shanē ibubū nami inū, soldadobu habu shanē ibubū nami inū, hamapai huni kuxipabū nami inū, cavalo nami inū, dasibi cavaloki katsaumeabū nami inū, hunibū tsumabū nami inū, tsuā tsumabumā nami inū, hamapai yura betsa betsapabū Deus nīkaisbuma Jesusū hatu maema habū nami pitxakayamakāshunā”, ikai ē nīkashuki.

¹⁹Hanushū ana ē uīyā yuinaka mese atimapahaira inū, shanē ibubu mai hirabi anua inū, hatū soldadobu itxa ha cavalo hushupaki katsaumea hawē soldadobuya hatube detenamēnū ika itxa maniabū ²⁰ha parā hātxa yuishunikatū yuinaka mesē besuuri atimaska betsa betsapa tsuā atiruma wakī habu yuinaka mese atimapahairatū kena habu hē iyamama inū hawē dami kēwāmisbu hatu parāmiswē taeshū parā hātxa yuishunika Shanē Ibu binuatū tsumabū atxikī yuinaka mese atimapahaira habe atxitā nīkaibu hanu iā enxofre paxinipa menui here hi hi ikai anu ha dabe hatu putabu ²¹cavaloki katsaumeshū hawē nupe txai pa hawē hashpanu tukuāwē dasibi yura betsabu Jesusū hatu detekī keyukē peiyabū dasibibu habū nami pi shuku dakakī yani waibu ē uīshuki.

1.000 ano Jesus Cristo shanē ibushanikiaki, na hātcharā

20 ¹Hanushū ē ana uīyā nai tsuma betsa nai anua butukirākī ha kini keyatapa shākīhaira hawē bepēti chave inū mane dispi txiwetameya ewapa tsuma ē uīshu matu yuinū nīkakāwē. ²Ha nai tsuma hukiranā, yuxibu sheanā ha dukū dunutā parananaī taeni hawē kena dabe Diabo inū Satanásrā, atxishū mane dispiwē neshatā 1.000 ano ³kini keyatapahaira anu urēshū hawē beputiwē bepukī mestēhairawatā hawē unātiwē beputiki tsamīkī unāti watā 1.000 ano bitxitā hanu mekekubaīshanikiki, hau ana mai hirabi maniabu hatu parāyamanunā. Hakia ha 1.000 ano keyukainaya hau ana hatu haskarawanū hawa wama kaīmatā ana hatishuīra bari Satanás yunuama ishanikiki.

⁴Hanushū habū hatu unāti washanai haki tsaushū unāti wati habū hatū kuxipa biaibu ē uīshuki. Ha dikabi Deusū yusīa txibākī txitūāma Jesuskiri yusīkubainaibu habū bushka teshteabu hatū yushī ē uīshuki. Habu ikirā, ha yuinaka mese atimapahaira inū, hawē dami kēwābuma inū, yuinaka mese atimapahairatū enabu unāti habū betūkuki inū hatū mekē petxiki hatū kene netāmakī amama ikubainimabuki. Haskawē taea ana besteī benibaū 1.000 ano Jesus Cristobe shanē ibushākanikiki. Haskaibu ē uīshuki, ⁵habu dukū mawakubirāpaunibu besteī taeirā. Hanua 1.000 ano keyui maekainaya ha mawanibu betsaburi bestēriashākanikiki. ⁶Ha inū, Deusū hawenabu wakī meribi wanishū habu dukū bestēwanā, benimahairashākanikiki. Haburā, ana hawa hatū kuxipa mawa dabeki hayamahaira ishākanikiki. Haskawē taea Deus inū Jesus Cristo dayashuni hātashuni besti habe shanē ibui 1.000 ano habe shanē ibushākanikiki.

⁷Hanushū ha 1.000 ano binukainaya mai kini keyatapahaira anua hawē nai tsuma Satanás Deusū mistumanishū kaīma ⁸tashnitā nawabu dasibi mai hirabi anu hiwebaunabu anua tibi hatu parākī ha mae Gogue inū Magogue anua hawenabu soldadobu itxapawakī iānēwā keshanua maxiti wakī habube detenameti itxawashanikiki.

⁹Mai hirabi anua bui Deusunabu hatu manakai itxabu inū ha mae ewapa Deusū abuhairai ha dabe keshei beabu anu Deusū nai anua txi here hatu anu puta hatu kuakī yamawatā ¹⁰hanu ha iā hanu enxofre paxinipa menui here hi hi ikai anu yuinaka mese atimapahaira inū parā hātxa yuishunika nai tsumabū urēnibu anu Satanásri urēa haria bariri inū mexu merā niti akama Deusū hatu isī tenematxakayamashanikiki, hawa huīrukūti hayama niti ikama akibi akinā.

Hawē henekī mawanibu nukū Shanē Ibū hatu unāti washanikiaki, na hātcharā

¹¹Hanushū Shanē Ibu haki tsauti hushupa hawēruahaira nukū Shanē Ibu haki tsauwa ē uīshuki. Tsaukē bari inū, ushe inū, bixi inū, mai keyu tsekebaini nixmai yamakainaya ¹²hanua dasibi shanē ibubu inū shanē ibubuma mawanibu ana bestētā Shanē Ibū besuuri mapuabū hawara betsa betsapa akubainibu Deusū haki kenemis una itxapa bepētā hanua una betsa tsuabūra Deus txibākī Jesus ikūwai niti ikama Deusbe hiwekuīshanaibu habū kena Deusū haki keneriakubaīmis una betsa hawē hiwemati kene bepēriashū ha habu hiweshū haska wamisbu hatukiri ha unaki kenekubaīmisshū dasibi mawanibu ana bestēa mapuabu habis hatu yuikī hatu unāti wakeakeaya ¹³iānēwā batapa anua mawanibu inū hanu mawabu bumisbu anua mawanibu habu Deusū bestēwātā itxawashū haskarara hiwekubainibu habu tibi unāti wakī pepabu inū txakabubu hatu kupiaya ¹⁴hatū hatu mawamanika inū hanu mawabu bumisbu anu ha iā hanu menui here hi hi ikai anu hau dabeki mawakī menunūbū hatu urēa ¹⁵tsuabūra Deus txibākī Jesus ikūwābuma habū kena Deusū haki kenemis una anu habū kena hayama ha iā hanu menui here hi hi ikai anu ma hatu puta keyuabuki.

Jerusalém bena Joāonē uīnikiaki, na hātcharā

21 ¹Ha haskaibutiā habu dukū bari inū, ushe inū, bixi inū, mai damiwani bepemanai shabakainaya iānēwā batapari hayamaya habiatiāri ana uīkī nai bena inū mai bena tashniriāi ē uīriaxinaki.

²Hanushū ana betsa tashnikiranai uīkī aībū huni benewanū, iwanā, hawē beneki nukui kanū ika hawēruai keskamis Jerusalém maewā bena ma dasibi iruya pepaya Deusū nai anua buteaya ³shanē ibu haki tsauti anushū hui kuxipawē yuiāi ē nīkaya: “Uīa. Na maerā, haki, ha merā yurabube Deus hiwepakeshanairā. Hawē hatube hiweirā, hawenabubes ishanikiki. Deus ha besti habū mekenika ishanikiki. ⁴Haskawē taea habu kashamisbu hatū beū tashka watā ana mawa hayama inū, ana saī ikama inū, kasha hayama inū, isī hayama dasibi haska Deusū hawē bika hiweti wani beshtekī ana ha hayama wakī”, ikaya

⁵hanua shanē ibu haki tsauti anushū nukū Shanē Ibū ea yuikī: “Txanima hātxa xinā kaya ē mia yuiai keneriwe, eskarā. Uīa. Eānā, dasibi ē bena wakī keyuiai”, itā

⁶ana ea yuikī: “Dasibi haskashanai ē yuinirā, ma ē akī keyuaki. Ea dukū ē ini inū niti ikama ē hiwepakeshanai. Tsuabūra ūpash akatsis ikī manuaibu keska ea anu beaibu ē hatu hiwea ināshanai, hawa hatu pakamamarā. ⁷Ha inū, tsuabūra ea danāma habū maemakī binumisburā, ea ē hatū mekenika Deus ikaya habu ē bakebu na mae bena anu hawa benuama ebe hiwei ikibi ipakeshākanikiki. ⁸Hakia hamē ekiri hātxabiai eki dakemis inū, eki petxia hawa xinaisbuma inū, yura betsabe danānanāmisbu inū, yura betsa tenāmisbu inū, txutanamebaūmisbu inū, mukayakī Satanāsā kuxipa yukamisbu inū, yushī dami betsa kēwāmisbu inū, txani txakabaūmisbu habu dasibi ē kupia hanu buirā, ha iā hanu enxofre menui here hi hi ikai anu ha hatū dabeki mawa meshākanikiki”, ea wa ē matu keneshunai.

⁹Hanushū sete nai tsumabū ha sete Deusū yurabu hawē henea kupiti mese kētxa betsa mata tsuma eki nukushū ea yuikī: “Txashuwā bakē aiyāshanai yusīkī mia kayatiwamanū nerishū uīyuwe”, iwanā, ¹⁰ha nai tsuma ē yushīki nukushū nama keskawē mati keyatapa anu ē yushī ea iyushū Jerusalém maewā pepahaira meribi Deusū nai anua buteai ea uīmaxina matu yuinū nīkakāwē. ¹¹Hawē maewā txasharā, Deusū shabawaki. Nēkati betsa jaspe kasmai cristal karuhaira beshnā bixtu keska bakamanai txashamai ē uīshuki. ¹²Hawē kene keyatapa kuxipawē dakēbauna inū, hawē hikiti shui beputiya 12 hayaki. Ha inū, ha hikiti shui tibi anu nai tsuma betsā keshea inū hikiti shui mamakī tibi Israelī 12 bababu shukua tibitū habū hatū kena betsa tibi kene hayaki. ¹³Ha inū, bari huaikiri lesteuri hikiti shui dabe inū besti haya inū, norteyuri habiatiri haya inū, sulkiri habiatiri haya inū bari hikiaikiri oesteuri habiatiri hayarikī. ¹⁴Ha inū, hawē kene keyatapa hawē kuxipa wati 12 mixkipawā hawē mestēwākī tsamabauna keneyaki. Ha inū, txashuwā bakē 12 tsuma kuxipayabū kena tibi mixkipawā tibiki nea hayaki, hatū kenarā.

¹⁵Hanua ha nai tsumā ea hātxa waitū maewā inū hawē hikiti shui inū hawē kene kawana tananū, iwanā, hawē tanati tawa keska ouro tsumashū ¹⁶hawē tanashuki. Maewā hawē txaipa inū hawē hashpa inū hawē keyatapa hawa binuama habiatishūbus 2.200 quilômetro iakea hayaki. ¹⁷Hanushū kene hawē hashpari tanashuki. Hunibū tanamis keska wakī nai tsumā ha tanatiwē kene hawē keshtu 64 metro tanashuki.

¹⁸Hawē kenekiri matu yuinū nīkakāwē. Ha dukū mae hirabi ouro keska dasibi taxipa txashahairakī. Ha inū, hawē kenerā, jaspe nēkati nāketapa beshnā karuhaira kenekawana hayaki. ¹⁹Ha inū, mixkipawā habuki kene tsamabaunabu nēkati karuhaira tibiwē dauyaki. Mixkipawā ha dukū jaspe nēkati hayaki. Ha segundo safira nēkati nāketapa hayaki. Mixkipawā

ha terceiro calcedônia nêkati hayaki. Ha quarto esmeralda nêkati nâke kurupa hayaki. ²⁰Ha quinto sardônica nêkati hayaki. Ha sexto sárdio nêkati hayaki. Ha sétimo crisólito nêkati paxinipa kurupa hayaki. Mixkipawā ha oitavo berilo nêkati âkunepa hayaki. Ha nono topázio nêkati hayaki. Ha décimo crisópraso nêkati âkunepa beshmas hayaki. Ha undécimo jacinto nêkati nâke beshmas hayaki. Ha 12 mixkipawā hawē henea ha duodécimo ametista nêkati minanepa hayaki. ²¹Ha inū, ha 12 beputi tibirā, pérola txuri mane ewapahairabuki. Ha inū, maewā hawē niti bai kayarā, beshnâhaira ouro has bishtu keska bakamanaikiki.

²²Ha inū, Deusū maewā bena hirabi anushū Epa Deus Shanē Ibu binu keyua inū hawē bake txashuwā habu kēwākubaïmisbuwē taea hawē kēwāti hiwe hayama ē uīshuki. ²³Ha inū, ha maewā anurā, Epa Deus hawē kuxipawē txashahairamis inū txashuwā bake bī keskai txashai hi imiskē ana bari inū ushe hawē txasha ana habu hayamaki. ²⁴Haska inū, nawabu dasibi ha maewā anu mapuirā, bī txasha keskawē mapushâkanikiki. Ha inū, shanē ibu Deusunabu mai hirabi anuabū hatū mabu pepa Deus ināshâkanikiki. ²⁵Ha inū, hawē beputirā, shaba ikibi ikawē taea bepēmanaibi bepēmanaki, hawa ana yame hayamawē taearā. ²⁶Ha inū, beputi shui anu hikikī nawa betsa betsapa xarabū Deus kēwākī dasibi hawē hawērua hayabu inanū ika hikishâkanikiki. ²⁷Haskabiakē tsuabura atimapamisbu inū, hawara Deusū danāmis amisbu inū, habu txani txakamisbu habu hari hikitaskama ishâkanikiki. Hakia hamē habu hikirā, tsuabūra kena txashuwā bakē hiwe kuīa una merā Deusū netāni habu besti Deusū mae bena anu hikishâkanikiki.

22 ¹Hanushū shanē ibu haki tsauti Deus inū txashuwā bake haki tsauwabu anua hene hiwekuīa haya kawana beshnā pehaira bishtu keska nai tsumā ea uīmashuki. ²Haska ha bai kaya namakis hene kesha uke dabebi hawē hiwemati hi mapubaina ē uīshuki. Hawē bimi betsa betsapa ushe tibi betsa maei bimimisbuki, hau Deusunabū pipakeshanūbunā. Ha inū, habia hi peiwē yurabū hamapai betsa betsapa tenekubainaibu hawē peiwē shushatirubuki. ³Ha inū, Deusū mae anu hawa yupukunāti hayamaki. Ha inū, shanē ibu haki tsauti anua Deus inū hawē bake txashuwā bake tsauwabū ha mae merāshū Deusunabū habū hatu kēwākubaïshâkanikiki. ⁴Haria Deusbe beisinā dabeshâkanikiki, Deusū kena hatū betūkuki nea hayarā. ⁵Hari hiweabu anu ana yame hayama inū hanu hiweshū nukū Shanē Ibu Deus hatu hiwemakī hatu shabawashūkē habu habe shanē ibui heneama ipapakeshâkanikiki. Haskawē taea ana barī txasha inū bīmā txasha hayama ishâkanikiki.

Jesus ana hushanai ma kemaikiaki, na hātcharā

⁶Hanushū nai tsumā ea ana yuikī: “Txanima hātcha ē mia yuiiai nīkawe. Nukū Shanē Ibu Deusū hawē hātcha yuishunikabu hawē hātcha hatu

yunumistũ haskarara samama ishanai hau hawẽ tsumabũ yusishanũ, iwanã, ẽ hawẽ nai tsuma hawẽ hãtxa eari yunushuki, ẽ mia tapĩmanunã. Deusũ txanima hãtxa tibi yubakatã ashanai ẽ mia uĩmashu ẽ mia yuiai nĩkatã ikũwãriwe”, ea waya

⁷Jesusũri ea yuikĩ: “Uĩa. Ẽ samama ana kashanaii. Haskakẽ na hãtxa haskarara inũbariaikiri txaniai kenekĩ mĩ una wairã, tsuabũra ikũwãkĩ txibãshanaiburã, Deusũ hatu benimawashanikiki. Manayuwe”, ea washuki.

⁸Ẽ Joãonẽ dasibi na hãtxa nĩkakĩ na betsa betsapa uĩkĩ keyui benimai huĩti xinã txãkaĩ nai tsumã ea uĩmakubaĩshu kẽwãnũ ika hawẽ tae namã ẽ dãti ikaya ⁹ea nemakĩ yuikĩ: “Haskayamawe. Mia keska eari ẽ Deusũ tsumaki. Mĩ betsabu Deusũ hãtxa yuishunikabu betsa inũ dasibibũ na hãtxa kenekĩ mĩ una wai habũ txibãshanaibu keska eari ẽ hatu keskaki. Deus besti kẽwãwẽ”, ea watã

¹⁰nai tsumã ana ea yuikĩ: “Dasibi ẽ mia uĩmashu haska inũbarikiki. Haskawẽ taeshũ na Deusũ hãtxa huneama na mĩ una wai ma bari keyui kemai hawẽ unãshãkanikiki. Ana huneama shabakabi haska tibi kaĩkũkaini deskekũkaishanikiki. ¹¹Haska inũ, tsuara txakabui hiwearã, hatu beshteyamawe, hau habiaska txakabu txibaĩ hiwenũbunã. Ha inũ, tsuara atimapa hiwearã, hau hawẽ atimapa txibaĩ hiwepakenũbũwẽ. Ha inũ, tsuara pepai hiwekatsis ikirã, hau pepa besti wakubainũbũwẽ. Ha inũ, tsuara meribi Deusunabuirã, haska Deusũ abuai keska hau ikubainũbũwẽ”, ea waya

¹²Jesusũ ana ea yuikĩ: “Uĩa. Ẽ samama ana kashanaii. Kakinã, hatũ manakuti tibi ẽ hatu bushũshanaii, haska tibi hiwemisbu keska hatu inãĩ kairã. ¹³Ea dukũ ẽ tashnini inũ ẽ hawẽ henea debesekeaki. Ha inũ, earã, ea dukũ ẽ ini niti ikama ẽ hawẽ heneaki. Ha inũ, ea dukũ ẽ ini niti ikama ẽ hiwepakeshanaii”, ea washuki.

¹⁴Uĩwẽ. Tsuabura benimati hayarã, hatũ tari patsa keska wakĩ habũ xinã kayabiwẽ Jesus ikũwãkĩ txakabu Deus buamakubaĩmisbu hawẽ mae bena anu hikitã habu besti pekĩ hawẽ benimai hiweti hi bimi pikubaĩshãkanikiki. ¹⁵Hamẽ betsaburã, Deus danãkĩ hamapai txakabuwamisbu inũ, mukayakĩ Satanãsã kuxipa yukamisbu inũ, txutanamebaũmisbu inũ, yura betsa tenãmisbu inũ, yushĩ dami betsa kẽwãmisbu inũ, dasibi hamapai tibi abubaũmisbu inũ, txani txakamisbu habu haskamisbu besti baxikushãkanikiki, habu Deusũ mae pepa anu hikiamarã.

¹⁶Hanushũ Jesusũ ana ea yuikĩ: “Earã, Davĩ baba inũ pena bixi txashahairamis keskatũ ẽ Jesusũ ẽ mia yuiai nĩkawe. Deusunabu itxamisbu betsa betsapa anu haska ẽ uĩaĩ mĩ hatu pewakĩ e imashanũ, iwanã, ẽ nai tsuma ẽ mia anu yunua haska dasibi mia uĩmashuki, hau ẽ hãtxa mĩ hatu bumashanunã”, ea waya

¹⁷hanua nũ Txashuwanẽ aĩnẽ habũ nũ ikũwaĩbunã, Yushĩ Pepabetã Jesus yuikĩ: “Huriwe!” nũ ikaya tsuabũra nuku nĩkakĩ: “Hau hurinũwẽ!” hau irianũbũwẽ. Ha inũ, tsuabura ũpash manui keskakĩ Deus benakĩ Jesus txibãkatsis ikĩ hau ikũwanũbũwẽ. Haska watã hawẽ ũpash hiwemati haya hau aki benũbũwẽ, hawa pakamarã.

¹⁸Na hãtxa dasibi Deusũ ea bebũkiri uĩmashu nĩkatã ẽ matu yuiiai nĩkairakãwẽ. Na dasibi hãtxa Deusũ ea yuishuyabi parananãkĩ tsuabũra ibubis hatũ hãtxa kenekĩ ana unakia kene txitxikĩ ewa watã yuikĩ: “Narã, dasibi Deusũ hãtxaki, txanimarã”, itirubu bebũkiri ẽ matu mesewaii. Tsuabũra haska washanaibu hatu kupikĩ ha itxakawati betsa betsapa ea yusĩshuwẽ Deusũ ana kupiti betsawẽ hatu kupishanikiki. ¹⁹Ha inũ, tsuabũra na hãtxa Deusũ ea yuishu ẽ una washukia ha unakia hãtxa betsa tere akaibuwẽ taeshũ Deusũ hawẽ benimai hiweti hi bimi haki tanabiyama hatu mebitã hawẽ mae pepa anu na unaki ea kenemashu keska wakĩ Deusũ hatu hikimama ishanikiki.

²⁰Na hãtxa hatũ ea pewamaitũ yuikĩ:

“Txanima ẽ samama ana kashanaii”, ikaki.

Habiaskaki. Nukũ Shanẽ Ibu Jesus Cristoõ, menã hawaira huriwe, nũ mia xinaĩnã.

²¹Nukũ Shanẽ Ibu Jesus Cristõ hau matu dasibi hawẽ pepawẽ duawakubaĩshanũwẽ.

Ea uĩmakubirãshu ẽ hãtxa txanimarã, hatiski.

João